

全唐文



欽定全唐文卷四百七十六目錄

韋行儉

新修嵩嶽中天王廟記

崔損


明水賦

鳳鳴朝陽賦

飲至賦

凌煙閣圖功臣賦

五色土賦



北斗賦

冰壺賦

霜降賦

秋霜賦

浮漚賦

述聖頌

祭成紀公文

沈既濟

論增待制官疏

上選舉議

選舉雜議

論則天不宜稱本紀議

詞科論

并序

選舉論

劉孺之

對升高判

禮代舊儀

禮書之

禮舉論

禮舉論

長

論傾天不宜無本

禮舉論

禮舉論

欽定全唐文卷四百七十六

韋行儉

行儉建中時人

新修嵩嶽中天王廟記

太室爲九州之險五嶽之冠孕靈生賢作鎮地中自漢武  
聞萬歲之呼令祠官加增其祠厥後元魏徙廟于嶽之東  
南開元十八年元宗徵元封故事再飾祠宇天寶初又命  
秩視王禮封爲中天王編在祀典每歲六月天子遣河南  
尹至嶽下潔齋具牲牲珪幣以行事祝史執籩豆樽俎以

陳辭望秩之祭以崇配天之敬歲無違者而年紀寢久其  
土偶木偶及東序西序南嚮北嚮圖形象者皆風落之日  
暄之雨濡之塵敗之或墉垣缺侈彩績漫滅不怒之威蓋  
闕如也漢南元戎滎陽鄭公由滎陽守而尹洛邑用端密  
溫文宣明教化爲導人之道聆其積弊俾革其故自中天  
王洎夫人纓綉冕服首飾步搖間以金翠彰用五色旁羅  
四嶽四瀆施於啟母少姨之倫其餘交乎戶室立于階闈  
操大屈注僕姑執爿秉鉞環列廡下由四墉周于墻垣過  
祠及門瞻其容衛者首如鎮目如瞋臂如戟吻如相稽擊



踞屏息若交門之有鄉坐拜者焉夫古之牧人事神必交  
修之人仰神之正直神依人之明德以享豐福以荷百祿  
真爲政之本也前代五嶽視三公皇家之制寵逾五等今  
徵鄭公崇飾肅祇之旨蓋所以奉國典尊君命也庚申歲  
行儉作吏承命歲事宮庭因歎識於石播美厥後云

崔損

損字至無博陵人大厯末進士中博學宏詞科授秘書省  
校書郎累擢右諫議大夫貞元十二年以本官同中書門  
下平章事賜金紫轉門下侍郎十九年卒贈太子太傅諡

曰靖

明才賦

以冷然感化潔  
我烝嘗為韻

大饗之禮明水攸先其水也所以本太古之淳樸其明也  
所以享至敬之昭宣從朗月之潛化應陰燧而通元暗度  
晴空泛銀河而色靜曉臨清廟浮玉露而光鮮既潤下以  
功博亦就濕而義全冥兆朕於至理契幽微於自然加五  
齊而致獻首三酒而告虔觀其象在乎天德包乎坎類影  
響之相召協陰陽之應感其禮斯節其色斯潔不假縮於  
包茅復何施於麴蘖將汗樽而並用與越席而齊列或異

乎勿慕有孚豈比夫不食而潔晶晶熒熒清清冷冷明德  
惟馨神人是聽從無味而有味自無形而有形深源莫測  
實資造化濯桂影於遙天洗蟾光於永夜懿夫昭潔著贊  
既賞常蒸宜玉笋之見貯匪金盤之見承若乃鼎俎備設  
嘉羞眾夥苾苾芬芬名之莫可尚其本也知享獻而靡他  
貴其新也諒斟酌而在我於維巨唐穆穆皇皇崇初祀異  
烝嘗元酒乃薦至誠允臧天降其福地出則祥醴泉洋洋  
明水是將徹慶雲之色映瑞日之光羣臣作頌歌孝治之  
無疆

鳳鳴朝陽賦

以鳳鳴山陽振翼飛舞為韻

杲杲今日景于彼朝陽萋萋兮桐葉于彼高岡來儀者鳳  
允叶禎祥瑞四靈之嘉號煥五彩之文章既和其音爰翥  
其翼淒啖響暢徘徊綢直旁應元律調十二管於四時上  
陵紫烟擊九萬里而一息非丹穴勿處非蒼竹不食小鵬  
起於扶搖卑鸞棲乎枳棘若夫雞冠燕頤心遠貌閑雖眾  
禽之累百諒比德而難攀故其發聲也瞻白日以俯仰其  
餘響也順清風而往還浮泛泛以出谷靜泠泠而滿山既  
飄颻於有際遂遼夏於無間故曰鱗之有龍鳥之有鳳偶

時而見如哲士之間生取類而言同君子之異眾乃拂  
杳冥而直上臨峻極而孤鳴虛籟相和陰深窈窳霏烟  
動色紛郁而隨迎六合爲之澄朗八風於是揚清川不波  
而昭其德地不翳而感其聲足使俗登仁壽化洽休平且  
夫朝陽者象明時之有漸鳳鳴者匹賢人之惟信鳳集朝  
陽以輕舉賢遇明時而易進整羽翮以迴翔望青雲以奮  
振有若秉節操而貞白垂簪纓而敬慎鳳兮鳳兮何  
威鏘鏘于飛應有道而歲貢夏無文而代希飲必  
津遊必神仙之府矯翮則羣族咸從和樂而百

阿閣以應昌期棲丹闕而壯天宇載圖牒以傳  
於聖主包眾美以流芳固難得而覩縷

飲至賦

以破敵有功為韻

聖人推有功擇賢佐武義舉湛恩播所謂君良臣忠上  
下和鬼方難制敢稱亂以蕩搖遐夷恃險不恭命而朝賀  
然後興以戈矛伐其怠惰自彼曲而我直必義勇而遙破  
有若霸由一戰晉文伐國以定功師興七旬有苗崩角而  
自挫然後成大禮廣庶績乃公乃侯左賢右戚一人有慶  
必偃武修文四海無虞乃銷鋒鑄鎬宰夫供其牢醴樂人

陳其夏擊英英之士爵勞先以伐謀侂侂勇夫寵命嘉其  
勦敵惟我后貫三古之睿哲繼百王之絕紐用伊呂則舉  
無遺策扶衛霍則功稱不朽每懷遠以賞功因勞軍而獻  
壽坐朝飲至同魯史之策勲在泮獻馘恥漢家之斬首遠  
方安而猶慎多壘靜而不有及夫殊勲既答王澤斯崇勞  
還師以杖杜賜侯伯以彤弓勇爵勸能懦夫增氣於無敵  
拔卒爲將武臣誓心於有功然後震海遠闢天下大同教  
化無外昭明有融覩班師之盛禮莫不勵志而飭躬

凌煙閣圖功臣賦

粵若聖唐之御極也寰宇克清鴻業再創纘功臣之烈紀  
重閣之上圖照日而增明閣凌煙而益壯勲庸自表威儀  
可望昭昭兮藻繪之容灼灼兮丹青之狀遠而視疑列仙  
之臺逼而察識公侯之相縹緲兮映空色而遙徹咫尺兮  
近天顏而內向稽其義知聖君之膺時覩其象知忠臣以  
應期叶雲龍之潛會合魚水之相資覽炎漢之前規寧或  
比矣徵大魏之往制何可尚之懿夫容彩彰施氣肅端儼  
風存正直色形恭儉若進忠以欲諫如率禮而有檢處其  
高也方取貴於功高居其險也固非同於履險則知君策



勲兮旌於賢臣在圖兮參於前名位雍雍就丹楹而成列  
衣冠楚楚煥藻井而相鮮美繪迴超於雲閣崇勲豈比夫  
燕然是以皇心斯遠聖慮惟遐謀猷是念貞忠是嘉不然  
者豈徒飾藻繪之功悅輝煥之像對重纒之宏麗翫峻宇  
之宏敞而已也所以作其炯誠激乎勸賞有以讚丕績之  
奕休有以念前勲而存想徒觀乎峒亭天半龍從雲中容  
止有作光芒有融廓宇宙而翼聖配丹青而紀功藹城闕  
之佳氣被君王之德風仰之彌高媿星辰正拱於紫極望  
之不及謂申甫將降於維嵩豈不遇聖明之主建公忠之

節石有時而泐水有時而竭茲閣也不騫不崩表功臣之盛烈

五色土賦

以皇子畢封依色建社為韻

至哉土德光含五色其色也辨五方以建侯其德也發萬物以生植自夏禹而作貢在徐方而自職王者立社以封疆諸侯苴茅而有國於赫巨唐德之皇皇實乘土而化康采大漢強幹之宜裂地以爵法有周維城之制分土而王各班其位各正其方用甲日而靡忒建陰氣而允臧定五方而式序分五色而有章平野煙消發卿雲之瑞彩高入

兩霽浮麗日之重光衆色環封所以示外共其方職正色  
居上所以表內附於中黃觀其儀則知大君之有弼稽其  
旨則知邦伯之有秩列三則惟數在五參十端則惟德  
居一既明既麗可以比乎入文不騫不崩所以保乎陰隲  
配皇王之永久齊天地而終畢矧夫經邦理社必土是封  
光昭聖德叶贊時雍將尊天以親地在侯土與國社既蕃  
翰乎四海實底寧乎天下若然者君立社以布政臣受土  
而宣威象君臣之同理知社土之相依是以成百王之則  
作萬邦之憲珪璋玉帛莫不因我而執公侯伯子莫不因

我而建土之德也斯美社之義也奚擬其色也匪同五星而乍連乍散其質也各表一方而嶽立山峙有以崇國祚於我皇有以同磐石於宗子夫如是則其義廣矣豈斯文之所能盡紀

北斗賦

以成象在天維北有斗為韻

倬垂象以昭回惟帝居之曰斗壯魁台以立極建衡杓而為首齊七政而均序五行臨四海而橫制九有所以附乾樞壓坤紐攜龍枕參左槍右楛總列宿而環衛中宮體羣臣而輔弼元后範圍六合紀綱四維其道不昧其照無私

若乃銅渾作式未央取則其變可考其動可測履端於始  
當獻歲以指南舉正於中在陰方而主北觀夫崢嶸纏聯  
若綴若懸冰散珠圓乍似拔長劔而倚天揭西柄以戒滿  
拱北辰而處偏乘三台而幹運齊七曜而迴旋酌天地之  
心豈酒漿之可挹分寒暑之氣較鈞石而罔愆躔次靡失  
歷數斯在晝其隱也不爭曜於太陽昏必見焉寧藏暉於  
真宰照萬國兮猶魚從網宗百川兮比朝於海參差北斗  
闌于太清環帝座之焜耀薄河漢之縱橫不應豐以中見  
每居次而自明總五緯於天統行四時而歲成非止雄橋

梁於巴蜀壯都邑於咸京而已於是萬人攸仰萬物取象  
實星之長

冰壺賦

以清如玉壺冰何  
慚宿昔意為韻

炯乎太陽之精玉有真質冰則貞清我君子象諸温如皎  
如正其色兮非真不克峻其節兮非貞不居爾其製盤盃  
訪結綠瞻白虹之氣詠生芻之束乃賦於他山攻此良玉  
剡之成器錯以成壺信以旁達忠不掩瑜以虛而受用當  
其無及乎嚴律閉陰氣升氛霧結河海凝沙驚雁塞雪滿  
嶠陵於是天景初夕玉壺始冰臨象筵而孤映對金鏡而

相澄爾其淋漓未泮溫潤而瑳纖光不隱毫末不過豈爾  
瑕之可匿玷之可磨不然珉之衆矣貴玉者何心之潔矣  
飲冰則那莊氏寓論宣父式談夜光奪魄明月懷慚豈比  
夫立槩生操激清勵貪伊至人之比德同貞士之司南夫  
以物象所鑒精明所蓄霜華晨清月影寒宿故覽之者魂  
竦憑之者慮惕迨北風之已壯幸西陸之未覲客有撫而  
歎曰猗歟猗歟吾無是易且漏卮無當兮歎諸古大圭不  
琢兮聞諸昔曷若茲器之可佳諒君子之宏益然後宣其  
烈贊其意抽毫命簡賦冰壺之盛事

霜降賦

以霜降之日射  
乃祭獸爲韻

天地之氣巖凝爲霜候高秋於玉琯體正色於金方表肅  
殺而順時戒節協變化而開陰闔陽激清風而增厲淨皓  
月而浮光驚鴻雁之嗷嗷落蒹葭之蒼蒼所以從地而升  
應律而降詠團扇而見託班姬豈恨於長門履堅冰以是  
階袁安欲驚於陋巷達重陰而首出啟沍寒以先期陰與  
律而相感寒與氣而相資百工由是休矣萬物於焉成之  
原夫日次於氐月窮於戌當青女以紀候從白露以受質  
洞庭之葉驚波豐山之鐘應律詩人可比庶欲徹於玉壺



大國是資亦將慙於凌室凝於地也似和光以同塵凋於  
木也類去華而取實其進也則有俟於清宵其退也則見  
晞於旭日若乃林有擊隼野有祭豸翻繽紛之槁葉宿莽  
蒼之枯蓼烈女覩之而壯志羈人對此而感懷皚皚其姿  
皎皎其彩既無惡於菅蒯亦何情於蘭茝佐昊天之有成  
參神功而不宰笳聲乍拂怨楊柳之衰兮劔鐔可封發芙  
蓉之厲乃國家順乾坤之德法天地之制布澤如春肅物  
成歲申其令以敦乎風俗宣其威以殄厥災沴服用有度  
修典禮而罔差稻熟可羞先寢廟而攸祭名籍籍於憲府

法稜稜於司寇却炎蒸而克敘四節淒金石而率舞百獸  
客有惜歲星之屢遷傷志業而未就獨沉吟於軒屏望次  
寥於宇宙聞萬戶之輕砧聽九重之永漏近瞻庭樹空聞  
槭槭而有聲緬想澗松誰惜青青而獨秀夫如是則可知  
霜降之候

秋霜賦

目長空以流思偉繁霜之獨異雖變露而成形不憑雲以  
自致向朝陽而既滅逢夜晴而又墜候暖而止乘寒則飛  
當鷹隼之始擊值鴻鴈之初歸稜稜作氣凜凜生成威比齊

紈之顏色奪楚劍之光輝及其降池塘被原陸衰眾草落  
羣木萎南澗之白蘋碎東籬之紫菊梧桐爲之失影葉荷  
爲之銷馥豈直若斯而已徒美其威不妄作動隨物情因  
其死者而死保其生者而生彫芝蘭而無怨色拂松竹而  
不傷榮譬大聖行刑必順於時序通賢用法不害於堅貞  
至若蒲海之居桑河之汭侵戰士之馬蹄封將軍之狐毳  
沾翠幕而生冷凍朱旗而自危劫陰氛之肅殺壯堅冰之  
體勢三冬閨閣兮貯相思苗 江山兮苦留滯不私於已  
觸物而止疑薄霧之初覆似輕塵之未起陵厲自然嚴凝

莫擬故能發揮司寇光揚御史明忠臣之無事承君子之所履

浮漚賦

仰參造化之理俯察宇宙之功既希微而不測亦要妙而無窮至如殷雷發谷激電流空石燕飛而迎雨銅鳥振而驚風已而懸溜不止空庭積水對滂沱而歷覽見浮漚之遷迤瑩映澄徹內明外美倏往忽來乍滅乍起含卷舒之度得行藏之軌其柔也則隨波以爲心其剛也乃觸物而忘已諒潛運之恍忽孰能察其終始浮漚之義大矣哉俯

而觀之錯落煌煜若明珠之出合浦遠而望之的皜旁羅  
若眾星之列長河爾其因水發色以空成相懷清潤之秀  
氣負圓通之雅量信天澤以成姿豈人圖而爲狀且夫勢  
有萬端形無定質或繁小而爭涌或希大而間出從下流  
而守謙託上善而非溢冀輝彩于當年故韜光于晴日

述聖頌

天輔聖德配極而崇帝者祖兮神行慈旨布澤而洽人之  
父兮叶命高鬱喻壽其齊招靈祐兮飛文孤標灑翰又類  
使物覩兮騰雄激烈交天聲芬偃上古兮發潤飄清總此

光氣覆下土兮探異閱妙意力猶懸空作短兮徵往到今  
辭聽相授無與伍兮

祭成紀公文

維貞元十二年月日朝議郎右諫議大夫崔損大中大夫  
行給事中徐岱朝議郎給事中趙宗儒正議大夫守中書  
舍人高郢宣德郎守駕部員外郎知制誥權德輿起居郎  
韋丹起居舍人楊馮左補闕熊執易右補闕歸澄崔邠韋  
渠牟左拾遺李肇王中書右拾遺蔣武等謹以庶羞之奠  
敢昭告于門下平章事贈子太傅成紀公之靈龍為輔

臣虞闢四門啟宗審象說代予言建中皇明崔爲文貞嗣  
德同風俾公登庸運配我唐忠昭我皇君臣合契聖賢同  
方乃序五行乃調三光乃作舟楫乃作棟梁溫裕內淑矜  
嚴外莊暖若冬日肅如秋霜錯磨瑚璉黼藻文章鼎不耀  
彩蘭非振芳疏封慶遠輔族流長祖服既纂孫謀更昌跡  
如泥蟠勢漸雲翔繡衣持斧錦帳含香曾建隼旟廉察三  
湘亦倅龍節和柔北荒左曹駁正中臺紀綱績徹宸宸恩  
深廟堂東西掖垣左右輔弼獻納忠讜訐謨慎密嘉猷必  
告內言罔出清廟承天圓丘捧日宣子制典鬱侯定律有

倫有要惟精惟一功讎必舉愛犯斯黜保正懲邪損虛勵  
實儉能防侈恭能戒逸假寐寢門宣力王室鈞軸是秉樞  
機所發先平其心後宰於物赫赫天子萬方稟朔寄公鼎  
鼐授公帷幄方資燮贊更致淳樸從藉千畝侍巡五岳福  
悲下壽忠惜永圖勃也厲疾倏焉夢殂皇心軫慟人望嗟  
呼賻贈恩篤哀崇禮殊騎吹咸京龜兆鼎城緱山舊隴太  
傅先塋某等相府僚屬禁闈分職敢辱陶冶愧生羽翼馬  
亨容誤龍鱗愛直孔雖不言辛亦有力徹帷啟殯執紼俟  
門奠薄單醪羞輕特豚悲實懷德忠何顧恩清風令範子



子孫孫嗚呼哀哉伏惟尚饗

沈既濟

既濟蘇州吳人楊炎爲相薦其有良史才召拜左拾遺史館修撰炎得罪坐貶處州司戶參軍入爲禮部員外郎卒

論增待制官疏

伏以陛下今日之理患在官煩不患員少患在不問不患無人且中書門下兩省官自常侍諫議補闕拾遺總四十五員及常參待制之官日有兩人皆備顧問亦不少矣中有二十一員尚闕人未充他司缺職累倍其數陛下若謂見

官非才不足與議則當選求能者以代其人若欲廣務聰  
明畢收淹滯則當擇其可者先補闕員則朝無曠官俸不  
徒費且夫置錢息利是有司權宜非陛下經理之法今官  
三十員皆給俸錢幹力及厨料什器建造廳宇約計一月  
不減百萬以他司息利準之當以錢二千萬爲之本方獲  
百萬之利若均本配人當復除二百戶反覆計之所損滋  
甚當今關輔大病皆爲百司息錢傷人破產積於府縣實  
思改革以正本源又臣嘗計天下財耗斲之大者唯二事  
焉最多者兵資次多者官俸其餘雜費十不當二事之一

所以黎人重困軸杼猶空方期緝熙必藉裁減豈俾閒官復爲冗食藉舊而置猶可省也若之何加焉

上選舉議

選舉之法三科曰德也才也勞也然安行徐言非德也麗藻方翰非才也累資積考非勞也今乃以此求天下之士固未盡矣臣謂五品以上及羣司長官宜令宰臣進敘吏部兵部得參議焉其六品以下或僚佐之屬許州府辟用其或選用非公則吏部兵部察而舉之加以謹黜則眾才咸得而官無不治矣今擇才於吏部而試職於州郡若才

職不稱責於刺史則曰命官出於吏曹不敢廢也責於侍郎則曰量書判資考而授之不保其往也責於令史則曰按由歷出入而補之不知其他也若牧守自用則換一刺史則革矣況今諸道諸使自判官副將以下皆使自擇縱有情故十猶七全則辟吏之法已試於今但未及於州縣耳

選舉雜議

或曰按國家甲令凡貢舉人本求才德不選文詞故律曰諸貢舉人非其人者徒注云謂德行乖僻者也居州郡則

廉使升聞在朝廷則以時黜陟用茲懲勸足為致理有司  
因循不修厥職寢以訛謬使其陵頽今但修舊令舉舊政  
則人服矣焉用改作答曰州郡濫孰與吏部多請較其優  
劣且州牧郡守古稱共理政能有美惡之迹法令有殿最  
之科分憂責成誰敢濫舉設如年多人怠法久弊生天網  
恢疎容其姦謬舉親舉舊有屬有情十分其人五極其濫  
猶有一半尚全公道如吏部者十無一焉請試言之凡在  
鈐衡惟徵書判至於補授祗校官資善書判者何必吏能  
美資恩者寧妨貪戾假使官資盡愜刀筆皆精此為吏曹

至公之選則補授之際官材匪詳或性善緝人

下闕

論則天不宜稱本紀議

史氏之作本乎懲勸以正君臣以維邦家前端千古後法萬代使其生不敢差死不忘懼緯人倫而經世道爲百王準的不止屬辭比事以日繫月而已故善惡之道在乎勸誠勸誠之柄存乎褒貶是以春秋之義尊卑輕重升降幾微髣髴雖一字二字必有微旨存焉况鴻名大統其可以貸乎伏以則天皇后初以聰明睿哲內輔時政厥功茂矣及宏道之際孝和以長君嗣位而太后以專制臨朝俄又

廢帝或幽或徙既而握圖稱籙移運革名牝司驚喙之蹤  
難乎備述其後五王建策皇運復興議名之際得無降損  
必將義以親隱禮從國諱苟不及損當如其常安可橫絕  
彝典超居帝籍昔仲尼有言必也正名故夏殷二代為帝  
者三十世矣而周人通名之曰王吳楚越之君為王者曰  
餘年而春秋書之為子蓋高下自乎彼而是非稽乎我過  
者抑之不及者援之不以弱減不為僭奪握中持平不振  
不傾使其求不可得而蓋不可掩斯古君子所以慎其名  
也夫則天體自坤順位居乾極以柔乘剛天紀倒張進以

強有退非德讓今史臣追書當稱之太后不宜曰上孝和  
雖迫母后之命降居藩邸而體元繼代本吾君也史臣追  
書宜稱曰皇帝不宜曰廬陵王睿宗在景龍以前天命未  
集徒稟后制假臨大寶於倫非次於義無名史臣書之宜  
曰相王未宜曰帝若以得失既往遂而不舉則是非褒貶  
安所辨正載筆執簡謂之何哉則天廢國家歷數用周正  
朔廢國家太廟立周七廟鼎命革矣徽號易矣旂裳服色  
既已殊矣今安得以周氏年歷而列爲唐書帝紀徵諸禮  
經是謂亂名且孝和繼天踐祚在太后之前而敘介製紀



居太后之下方之躋僖是謂不智詳今考古並未爲可或  
曰班馬良史也編述漢事立高后以續帝載豈有非之者  
乎答曰昔高后稱制因其曠嗣獨有分王諸呂負於漢約  
無遷鼎革命之甚況其時孝惠已歿孝文在下官中二子  
非劉氏種不紀呂后將紀誰焉雖云其然議者猶爲不可  
況遷鼎革命者乎或曰若天后不紀帝緒缺矣則二十二  
年行事何所繫乎曰孝和以始年登大位以季年復舊業  
雖尊名中奪而天命未改足以首事足以表年何所拘闕  
列爲二紀昔魯昭之出也春秋歲書其居曰公在乾侯且

君在雖失位不敢廢也今請併天后紀合孝和紀每於歲首必書孝和所在以統之書曰某年春正月皇帝在房陵太后行某事改某制云云則紀稱孝和而事述太后俾名不失正而禮不違常名禮兩得人無間矣其姓氏名諱入宮之由歷位之資才藝智畧年辰崩葬別纂錄入皇后傳列於廢后王庶人之下題其篇曰則天順聖武皇后云

詞科論 并序

開元以後四海晏清無賢不肖恥不以文章達其應詔而舉者多則二千人少猶不減千人所收纔百一禮部員外

郎沈既濟論曰

初國家自顯慶以來高宗聖躬多不康而武太后任事參  
決大政與天子並太后頗涉文史好雕蟲之藝永隆中始  
以文章選士及永淳之後太后君天下二十餘年當時公  
卿百辟無不以文章因循遐久浸以成風以至開元天寶  
之中上承高祖太宗之遺烈下繼四聖理平之化賢人在  
朝良將在邊家給戶足人無苦窳四夷來同海內晏然雖  
有宏猷上畧無所措奇謀雄武無所奮百餘年間生育長  
養不知金鼓之聲烽燧之光以至於老故太平君子唯門

調戶選徵文射策以取祿位此行已立身之美者也父教  
其子兄教其弟無所易業大者登臺閣小者任郡縣資身  
奉家各得其足五尺童子恥不言文墨焉是以進士爲士  
林華選四方觀聽希其風采每歲得第之人不浹辰而周  
聞天下故忠賢雋彥韜才毓行者咸出於是而桀奸無良  
者或有焉故是非相陵毀稱相騰或扇結鈎黨私爲盟敵  
以取科第而聲名動天下或鈎撫隱慝嘲爲篇詠以列於  
道路迭相談訾無所不至焉

選舉論

計近代以來爵祿失之者久矣其失非他在四太而已何者入仕之門太多代胄之家太優祿利之資太厚督責之令太薄請徵古制以明之管子曰夫利出一孔者其國無敵出二孔者其兵不誦出三孔者不可以舉兵出四孔者其國必亡先王知其然故塞人之養隘其利途使人無游事而一其業也而近代以來祿利所出數十百孔故人多歧心疏瀉漏失而不可轄也夫入仕者多則農工益少農工少則物不足物不足則國貧是以言入仕之門太多禮曰天子之元子士也天下無生而貴者則雖儲貳之尊與

士伍同故漢王良以大司徒位免歸蘭陵後光武巡幸始復其子孫邑中徭役丞相之子不得蠲戶課而近代以來九品之家皆不征其高蔭子弟重承恩獎皆端居役物坐食百姓其何以堪之是以言代胄之家太優先王制士所以理物也置祿所以代耕也農工商有經營作役之勞而士有勤人致理之憂雖風猷道義士伍爲貴其苦樂利害與農工商等不甚相遠也後代之士乃撞鐘鼓樹臺榭以極其歡而農工鞭臀背役筋力以奉其養得仕者如昇仙不仕者如沈泉歡娛憂苦若天地之相遠也夫上之奉養

也厚則下之徵斂也重養厚則上覬其欲斂重則下無其  
聊故非類之人或沒死以趣上構姦以入官非唯求利亦  
以避害也是以言祿利之資太厚語曰陳力就列不能者  
止昔李膺周舉為刺史守令畏憚覩風投印綬者四十餘  
城夫豈不懷祿而安榮哉顧漢之法不可偷也自隋變選  
法則雖甚愚之人蠕蠕然第能乘一勞結一課獲入選敘  
則循資授職族行之官隨列拜揖藏俸積祿四周而罷因  
緣侵漁抑復有焉其罷之日必妻孥華楚僕馬肥脂而偃  
仰乎士林之間及限又選終而復始非為巨害至死不黜

故里語謂人之爲官若死然未有不了而倒還者爲官如  
易享祿如此厚上法如此寬下斂如此重則人孰不違  
其害以就其利者乎是以言督責之令太薄既濟以爲當  
輕其祿利重其督責使不才之人雖虛座設位置印綬於  
旁揖而進授之不敢受寬其征徭安其田里使農商百工  
各樂其業雖以官誘之而莫肯易如此則規求之志不禁  
而息多士之門不高而閉若上不急其令下不寬其徭而  
欲以法術遮列禁人奸冒此猶坯土以壅橫流也勢必不  
止夫古今選用之法九流常敘有三科而已曰德也才也



勞也而今選曹皆不及焉何以言之且吏部之本存乎甲  
令雖曰度德居官量才授職訂勞升秩其文具矣然考核  
之法皆在判書簿歷言詞俯仰之間侍郎非通神不可得  
而知之則安行徐言非德也麗藻芳翰非才也累資積考  
非勞也苟執此不失猶乖得人況眾流茫茫耳目有不足  
者乎蓋非鑒之不明非擇之不精法使然也先朝數人以  
下言之詳矣是以文皇帝病其失而將革焉夫物盈則虧  
法久終弊雖文武之道亦與時張弛五帝三王之所以不  
相沿也是以王者觀變以制法察時而立政按前代選用

皆州府察舉及年代久遠訛失滋深至於齊隋不勝其弊  
凡所置者多由請託故當時議者以爲與其率私不若自  
舉與其外濫不若內收是以罷州府之權而歸於吏部此  
矯時懲弊之權法非經國不刊之常典今吏部之法蹙矣  
復宜掃而更之無容循默坐守刳弊伏以爲當今選舉人  
未土著不必本於鄉閭鑒不獨明不可專於吏部謹詳度  
古制折量今宜謂五品以上及羣司長官俾宰臣進敘吏  
部得參議焉其六品以下或僚佐之屬許州府辟用則銓  
擇之任悉委於四方結奏之成咸歸於二部必先擇牧守

然後授其權高者先署而後聞卑者聽版而不命其牧守  
將帥或選用非公則吏部兵部得察而舉之聖王明目達  
聰逖聽遐視罪其私冒不慎舉者小加譴黜大正刑典責  
成授任誰敢不勉夫如是則接名僞命之徒非才薄行之  
人貪叨賄貨懦弱姦宄下詔之日隨聲而廢通計大數十  
除八九則人少而員寬事詳而官審賢者不獎而自進不  
肖者不抑而自退除隋權道復古美制則眾才咸得而天  
下幸甚或曰當開元天寶中不易吏部之法而天下砥平  
何必外辟方臻於理既濟以爲不然夫選舉者經邦之一

端雖制之有美惡而行之由於法令是以州郡察舉在兩  
漢則理在魏齊則亂吏部選集在神龍則紊在開元天寶  
則理當其時久承升平御以法術慶賞不軼威刑必齊由  
是而理匪用吏部而臻此也向以此時用辟召之法則其  
理不益久乎夫議事以制不以權當徵其本末計其遐邇  
豈時得時失之可言耶或曰帝王之都必浩穰輻輳士物  
繁合然後稱其大若權散郡國遠人不至則京邑索矣如  
之何又甚不然自古至隋數百千年選舉之任皆分郡國  
當漢文景武帝之時京師庶富百廛九市人不得顧車不

得旋侈溢之盛亦云極矣豈待選舉之士爲其助哉又夫  
人有定土土無賸人浮冗者多則地著者少自隋罷外選  
招天下之人聚於京師春還秋往鳥聚雲合窮關中地力  
之產奉四方游食之資是以筋力盡於漕運薪粒方於桂  
玉是由斯人索我京邑而謂誰索乎且權分州郡所在辟  
舉則四方之人無有遐心端居尊業而祿自及祿苟未及  
業常不廢若仕進外絕要攢乎京惜時懷祿孰肯安堵必  
貨鬻田產竭家贏糧糜費道路交馳往復是驅地著而安  
爲浮冗者也京師之冗孰與四方之實一都之繁孰與

萬國之殷況王者當繁其天下豈屢閉之中校其眾寡哉  
或曰仕門久開入者已眾若革其法則舊名常調不足以  
致身使中才之人進無所容退無所習其將安歸乎既濟  
以爲人而志業隨崇替管庫之賢既可以入仕則士之  
不肖寧愧乎出流從古以然非一代也故傳云三后之姓  
於今爲庶今士流既廣不可強廢但鍵其舊門不使新入  
峻其官途不使濫登十數年間新者不來而舊者耗矣待  
其人少然後省官夫人之才分各有餘裕自爲情欲所汨  
而未嘗盡焉引之則長縈之則短在勉而已故凡士族皆

稟父兄之訓根聰明之性蓋以依倚官緒無湮淪墊溺之虞故循常不修名義罕立此教使然也若惟善是舉不才決棄前見爵祿後臨塗泥人懷憤激孰不騰進則中品之人悉為長材雖曰慎選捨之何適

劉孺之

孺之廣平人官司封員外郎遷京兆少尹

對升高判

解式與長年行因升高不從所視遂杖之式詎州斷鬪省科失入

設教以防禮不逆矣遇長不敬患至掇焉苟訓典之不修  
乃朴撻而何害相彼解式誠謂狡童五人羣居且間異席  
十年以長則必肩隨不恭辟呬之儀致闕升高之禮惑其  
所視吾何以觀之哉杖以作威固當斯害也已小人文過  
肆以薄言君子詰姦無從長傲歸諸司敗足示陵尊成以  
調人可徵犯齒且州司以刑頗均短綆會府是糾且異長  
鞭伊小大之以情庶寬猛以相濟



欽定全唐文卷四百七十七目錄

杜佑一

進通典表

論邊將請擊党項及吐蕃疏

三朝行禮樂制議

三朝上壽有樂議

徹食宜有樂議

讀時令議

省官議

尚書省官議

僕射議

通典序

杜城郊居王處士鑿山引泉記

御夷狄論

改定樂章論

欽定全唐文卷四百六十一目錄

欽定全唐文卷四百七十七

杜佑

佑字君卿京兆萬年人貞元三年累拜尚書左丞轉刑部尚書十九年拜檢校司空同中書門下平章事元和元年冊拜司徒封岐國公七年薨年七十八贈太傅諡安簡

進通典表

臣聞太上立德不可庶幾其次立功道行當代其次立言見志後學由是往哲遞相祖述將施有政用乂邦家臣本以門資幼登官序仕非遊藝才不及人徒懷自彊頗翫墳

籍雖履歷叨幸或職劇務繁竊惜光陰未嘗輟廢夫孝經  
尚書毛詩周易三傳皆父子君臣之要道十倫五教之宏  
綱如日月之下臨天地之大德百王是式終古攸遵然率  
多記言罕存法制愚管窺蠡測豈達高深輒肆荒虛誠爲  
臆度每念懵學莫探政經畧觀歷代衆賢著論多陳紊失  
之弊或闕拯救之方臣既庸淺寧詳損益未原其始莫暢  
其終尚賴周氏典禮秦皇蕩滅不盡縱有繁雜且用準憑  
至于往昔是非可爲來今龜鑑布在方策亦麤研尋自頃  
纂修年踰三紀識寡思拙心昧詞蕪圖籍實多事目非少

將謂功畢有愧乖疎固不足發揮大猷但微臣竭愚盡慮  
凡九門計二百卷不敢不具獻上庶明鄙志所之塵瀆聖  
聰兢惶無措

論邊將請繫党項及吐蕃疏

臣伏見近者党項與西戎潛通屢有降人指陳事迹而公  
卿廷議以爲誠當謹兵戎備侵軼益發甲卒邀其寇暴此  
蓋未達事機匹夫之常論耳夫蠻夷猾夏唐虞已然周宣  
中興獫狁爲害但命南仲往城朔方驅之太原及境而止  
誠不欲弊中國而怒遠夷也秦平六國恃其兵力北築長

城以拒匈奴西逐諸羌出於塞外勞力擾人結怨階亂中國未靜白徒競起海內雲擾實生謫戍漢武因文景之富命將興師遂至戶口減半竟下哀痛之詔罷田輪臺前史書之尚嘉其先迷而後復蓋聖王之理天下也唯務綏靜蒸人西至流沙東漸于海在南與北亦存聲教不以遠物爲珍匪求遐方入貢豈疲內而事外終得少而失多故前代納忠之臣並有匡君之議淮南王請息師於閩越賈捐之願棄地于珠崖安危利害高懸前史昔馮奉世矯漢帝之詔擊莎車傳其王首於京師威震西域宣帝大悅議加

爵土之賞蕭望之獨以爲矯制違命雖有功效不可爲法  
恐後之奉使者爭逐發兵爲國家生事述理明白其言遂  
行國家自天后已來突厥默啜兵強氣勇屢寇邊城爲害  
頗甚開元初邊將郝靈佺親捕斬之傳首闕下自以爲功  
代莫與二坐望榮寵宋璟爲相慮武臣邀功爲國生事止  
授以郎將由是訖開元之盛無人復議開邊中國遂寧外  
夷亦靜此皆成敗可徵鑒誠非遠且党項小蕃雜處中國  
本懷我德當示撫綏間者邊將非廉亟有侵刻或利其善  
馬或取其子女便賄方物徵發役徒怨苦既多叛亡遂起

或與北狄通使或與西戎寇邊有爲使然固當懲革傳曰  
遠人不服則修文德以來之管子曰有國家無使勇猛者  
爲邊境此誠聖哲識微知著之遠畧也今戎醜方強邊備  
未實誠宜慎擇良將誠之完葺使保誠信絕其求取用示  
懷柔來則懲禦去則謹備自然彼懷我德革其奸謀何必  
遽圖興師坐致勞費陛下上聖至仁覆育羣類動必師古  
謀無不臧伏望堅保永圖置兵衽席天下幸甚臣識昧經  
綸學慙博究竊鼎鉉之寵任爲朝廷之老臣恩深莫倫志  
懇思報臧否備閱芻蕘上陳有瀆旒宸伏深惶悚



三朝行禮樂制議

晉司律中郎將陳頌云昔杜夔傳舊雅樂四曲一曰鹿鳴  
二曰騶虞三曰伐檀四曰文王皆古聲辭太和中左延年  
改夔騶虞伐檀文王三曲更作聲節其名雖存而聲實異  
惟夔鹿鳴今不改易也魏代正朝大會太尉奉羣后行禮  
東廂雅常作者也後有三篇第一曰於赫篇詠武帝聲律  
與古鹿鳴同第二曰巍巍篇詠文帝用左延年所改騶虞  
聲第三曰洋洋篇詠明帝亦用左延年所改文王聲第四  
復用鹿鳴之聲重用而除古伐檀及晉初食舉亦用鹿鳴

按左傳穆叔如晉晉侯享之工歌鹿鳴之三三拜曰鹿鳴所以嘉寡君也敢不拜嘉毛詩云鹿鳴燕羣臣嘉賓也既飲食之又實其幣帛筐篚以將其厚意然後忠臣嘉賓得盡其心也詩傳並無行禮及叔孫通所制漢儀復無別行禮事荀氏云魏氏行禮食舉再取周書鹿鳴又以宴嘉賓無取於朝考之舊聞未知所應荀勗乃除鹿鳴舊制更作行禮詩四篇先陳三朝朝祭之義食舉歌詩十二篇元肇羣后奉璧趨步拜起莫非行禮豈容別設一樂謂之行禮耶荀譏鹿鳴之失似屬誤謬還制四篇復襲前軌

三朝上壽有樂議

禮記但有獻酬無上壽文惟詩雅云再拜稽首天子萬壽  
豳風云爲此春酒以介眉壽雖非灼然明文要是髣髴其  
實古者詩工皆歌之故可得而言也漢興叔孫通定禮儀  
七年長樂宮成諸侯朝禮畢復置酒侍坐殿上皆伏尊卑  
以次起上壽漢故事上壽四會曲注言但有鐘鼓無有歌  
詩魏初作四會有琴筑但無詩雅樂郭瓊云明帝青龍二  
年以長笛食舉第十二古置酒曲代四會又易古詩名曰  
羽觴行用爲上壽曲施用最在前鹿鳴已下十二曲名食

舉樂而四會之曲遂廢漢故事鄧吳及瓊等食舉之曲與  
時增損張華上雅樂詩表云魏上壽食舉時及漢代所施  
用其文句長短不齊皆未合於古雅漢故事則云上壽四  
曲華亦言有歌辭會其注當是闕文晉代歌詩傅元述具  
存

徹食宜有樂議

周官云王大食三侑皆合鐘鼓漢蔡邕云王者食舉以樂  
今但有食舉樂食畢則無樂按膳夫職以樂侑食禮記云  
客出以雍徹以振羽論語云三家者以雍徹子曰相維辟

公天子穆穆奚取於三家之堂如此徹食應有樂不容同用食舉也

讀時令議

讀時令非古制也自東漢始焉其後因而沿襲按太宰職正月之吉懸治象之法於象魏使萬人觀之又春官太史頒告朔於邦國玉藻復云聽朔於南門之外並無讀時令故事而辟閭仁諝云元日受朝讀令此則聽朔禮畢合於玉藻之文王方慶雖有所駁大旨與仁諝不異皆臆說也凡言時者為四時耳若正月之朔讀令則合云歲令何以

謂之時邪其夏秋冬又何爲不讀邪則辟間輩誤矣

省官議

議曰唐虞稽古建官惟百夏商官倍亦克用又周建六官各有徒屬雖上文去質吏眾事繁然而條流不紊職非重設秦氏立制多因時宜漢初沿襲後漸增廣光武建武六年廢罷四百餘縣吏職十置其一魏太和中分命使臣省州縣吏正始中又并合郡縣等晉太元六年省七百餘員隋開皇三年廢五百餘郡國家貞觀初省內官六百餘員詳設官之本爲理眾庶所以古者計人置吏故周官鄉遂

稍縣畿約人定員吏無虛設自漢魏晉隋暨於聖唐皆因  
戰爭流離征繕艱勞節省吏職存諸方策晉荀勗桓溫俱  
有此議息人救弊何莫由斯昔皋繇作士師正五刑今刑  
部尚書大理卿是二皋繇也垂作共工利器用今工部尚  
書將作監是二垂也契作司徒敷五教今司徒戶部尚書  
是二契也伯夷秩宗典邦禮今禮部尚書禮儀使是二伯  
夷也伯益作虞掌山澤今虞部郎中都水使者是二伯益  
也伯冏作太僕掌車馬今太僕卿駕部郎中尚輦奉御閑  
廐使者是四伯冏也古者天子有六軍漢家前後左右將

軍四人今則十二衛神策等八軍凡有將軍六十人也歷代增益以至於是舊名不廢新職日加名繁職重不可遍舉所以後周依古周建六官蓋由於此今畧徵外官別駕本因漢置隨刺史巡察若今觀察使之有副使也叅軍後漢末置叅諸府軍事若今節度判官也官名職務遷易不同空存虛稱皆無事實又司田頃景龍三年嘗置無何以煩冗却停併入司戶殊爲折衷誠宜斟酌繁省詳考損益欲求致理必也正名神龍中官紀隲齋有司務廣集選人競收名稱其時無闕注授於是奏署員外官者二千餘人



自爾遂爲恒制當開元天寶之中四方無虞百姓全實大  
凡編戶九百餘萬吏員雖衆經用雖繁人力有餘帑藏豐  
溢縱或枉費不足爲憂今兵革未寧黎庶凋瘵數年前天  
下簿帳到省百三十餘萬戶自聖上御極分命使臣按比  
收斂土戶與客戶共計三百餘萬比天寶中纔三分之一  
就中浮寄仍五分有二出租賦者減耗若此食租賦者豈  
可仍舊如一州無三數千戶置五十六員官十羊九牧疲  
吏煩衆顧茲大弊實思革之議者多云尚有跋扈未庭併  
省官吏之後恐被罷者仕進無路別有依託且縻爵祿兼

示隄防此乃常情之說慮非救時之論有才者即令薦用  
不才者何患奔亡而況各有姻戚顧戀家產後漢建武六  
年減縣省官公孫述隗囂未滅魏太和正始中則吳蜀鼎  
立晉太元六年吳國尚在隋開皇三年陳氏割據皆招羅  
俊乂志相吞滅此時猶不慮有失賢資敵務以救弊爲謀  
今田悅之徒並是庸瑣繁刑暴賦惟恤軍戎衣冠士人遇  
如奴虜豈比公孫述諸葛亮之在巴蜀孫權陳霸先之有  
江南固無范睢業秦賈季強狄之慮斯斷可知矣今若以  
人情因習既久不能更改制度併省內官但且權停省外

官別駕司馬及叅軍州縣額內官約人戶減縣尉其被罷者但有德行才器委州府長吏搜擇論薦固亦不遺器能如或渝濫先坐舉主誰敢罔冒以陷刑章其有不被舉論但全舊名任叅常調自當修進更俟甄收暫罷歲時何負此輩如柱國後魏末置並是當時宿德勲盛業崇皆主重兵寵貴第一周隋以後授受至多暨乎國家迴作勲級唯得三十頃地耳又開府儀同三司及光祿大夫亦是官名還爲人多迴作階級隨時立制遇弊變通不必因循重復改作待戎車息駕百姓稍寧欲增庶官則復舊制謹議

尚書省官議

議曰昔堯試舜於大麓領錄天下事是其任也周之司會  
又其職焉秦時少府遣吏四人在殿中主發書故謂之尚  
書尚猶主也漢承秦置及武帝遊宴後庭始用宦者主中  
書以司馬遷爲之中間遂罷其官以爲中書之職至成帝  
建始四年罷中書宦者又置尚書五人一人爲僕射四人  
分爲四曹通掌圖書秘記章奏之事及封奏宣示內外而  
已其任猶輕至後漢則爲優重出納王命敷奏萬機蓋政  
令之所由宣選舉之所由定罪賞之所由正斯乃文昌天

府眾務淵藪內外所折衷遠近所稟仰故李固云陛下之  
有尚書猶天之有北斗斗爲天喉舌尚書爲陛下喉舌斗  
斟酌元氣運平四時尚書出納王命賦政四海令及左丞  
總領紀綱無所不統僕射及右丞分掌廩假錢穀漢初尚  
書雖有曹名不以爲號及靈帝以侍中梁鵠爲選部尚書  
於是始見曹名總謂之尚書臺亦謂之中臺大事八座連  
名而有不合得建異議二漢皆屬少府魏置中書省有監  
令遂掌機衡之任而尚書之權漸減矣晉以後所掌略同  
八座丞郎初拜並集都省交禮遷職又解交本漢制也至

於晉宋唯八座解交丞郎不復解交也宋曰尚書寺居建  
禮門內亦曰尚書省亦謂之內臺每八座以下入侍門生  
隨入者各有差不得雜以人士凡尚書官大罪則免小罪  
遣出百日乏代人聽還本職其令及二僕射出行分道之  
制與中丞同令僕各給威儀十八人自晉以後八座及郎  
中多有不奏事梁天監元年詔曰自禮闈陵替歷茲永久  
郎署備員無取職事糠粃文案貴尚虛閑空有趨墀之名  
了無握蘭之實曹郎可依昔奏探自是始奏事矣又詔尚  
書中有疑事先於朝堂叅議然後啟聞舊尚書官不以爲

贈唯朱异卒特贈右僕射武帝寵之故也自魏晉重中書之官居喉舌之任別尚書之職稍以疎遠至梁陳舉國機要悉在中書獻納之任又歸門下而尚書但聽命受事而已後魏天興元年置八部大夫於皇城四方四維面置一人以擬八座謂之八國各有屬官分尚書三十六曹及諸外置令大夫主之四年又復尚書三十六曹天賜元年復罷尚書三十六曹別置武歸修勤二職分主省務至神麇元年始置僕射左右丞及諸曹尚書十餘人各居別寺北齊尚書省亦有錄令僕射總理六尚書謂之都省亦謂之

北省後濟北王以太子監國立大都督府與尚書省別理  
眾事仍開府置佐後周無尚書隋及大唐皆有其制略同  
凡尚書省事無不總龍朔二年改尚書省爲臺咸亨初復  
舊光宅元年改爲文昌臺垂拱元年又改爲都臺咸通初  
復舊長安三年又改爲中臺神龍初復爲尚書省都臺居  
中左右分司都堂之東有吏部戶部禮部三行每行四司  
左司統之都堂之西有兵部刑部工部三行每行四司右  
司統之凡二十四司分曹共理天下之事盡矣謹議

僕射議



按僕射秦官其名則微其職甚細東漢以後雖委任漸重  
職司會府而非百僚師長之職也又按丞相亦秦官秦氏  
每羣臣上表皆云丞相臣某為首漢之宗臣蕭何為丞相  
漢儀丞相進天子御座為起在輿為下有疾法駕至第問  
得戮二千石申屠嘉欲斬內史鼂錯是也霍光受顧託之  
重當伊周之地廢昌邑王上表太后丞相臣敞為首大司  
馬大將軍臣光次之其尊崇如此中間嘗置左右丞相亦  
嘗改為相國亦為大司徒大抵漢之丞相是為三公於天  
下無所不統後漢亦以三公為宰相則司徒本西漢丞相

也其後或爲丞相或爲相國或爲大丞相雖互爲之名其實一也曹公司馬師昭趙王倫王敦王導劉義宣齊高帝梁武帝爾朱榮陳武帝侯景齊獻武隋文帝皆爲之歷代多非尋常人臣之職亦多爲贈官然自秦以降實居百僚之長今尚書令統領眾務提舉綱目僕射貳之誠爲崇重且非統國政宰天下之任宜侍中中書令如直以尊崇則太師不然上公太尉始可師長命百僚也龍朔中天寶初嘗改侍中中書令爲左右相遠協伊尹仲虺爲左右相周公召公相成王爲左右之義斯誠允當或謂尚書令僕射

則錄尚書之職是官之師長按前代錄尚書霍光張安世  
王鳳趙喜牟融鄧彪張禹李固王導褚彥回齊明帝之徒  
或是三師或是三公或是大將軍大司馬兼之皆秉朝政  
猶古冢宰百官總已實宰輔也其時別自有令僕今僕射  
雖嘗改爲丞相名同而職異品秩又未崇極上有三司三  
公尚書令豈比前代丞相受任也其襲舊名無實者若今  
刺史皆云使持節按前代使持節得戮二千石其王公已  
下封國皆南面臣人分茅建社其開府儀同三司則禮數  
班秩皆如三公置府辟吏今並豈有其實乎此例甚不能

金定全唐文 卷四十七  
遍舉安有僕射因改丞相之名都無丞相之實而爲百僚  
之師長也又與丞郎絕禮若隔品致敬則諸司長官與隔  
品僚屬其可絕禮乎斯不然矣謹議

通典序

佑少嘗讀書而性且蒙固不達術數之藝不好章句之學  
所纂通典實采羣言徵諸人事將施有政夫理道之先在  
乎行教化教化之本在乎足衣食易稱聚人曰財洪範八  
政一曰食二曰貨管子曰倉廩實知禮節衣食足知榮辱  
夫子曰既富而教斯之謂矣夫行教化在乎設職官設職

官在乎審官才審官才在乎精選舉制禮以端其序立樂  
以和其心此先哲王致治之大方也故職官設然後興禮  
樂焉教化隳然後用刑罰焉列州郡俾分領焉置邊防遏  
戎狄焉是以食貨爲之首十二卷選舉次之六卷職官又次之  
二十卷禮又次之百卷樂又次之七卷刑又次之大刑用甲兵十  
五卷其次五刑  
八卷州郡又次之十四卷邊防末之十六卷或覽之者庶知篇第  
之旨也

杜城郊居王處士鑿山引泉記

佑此莊貞元中置杜曲之右朱陂之陽路無崎嶇地復密

邇開池水積川流其草樹蒙龍岡阜擁抱在形勝信美而  
躋攀莫由爰有處士琅邪王易簡字高德經術探於壺秘  
文章擅於風雅精識窮於治理奧學究於天人棲遲衡茅  
糝糠爵祿旁洽他藝尤精術數短褐或敝篋笥屢空守道  
安貧不求不競素嗜山水乘興遊衍踰月方歸誠士林之  
逸人衣冠之良士佑景行仰止邀屈再三惠然肯來披榛  
周覽因發嘆曰懿茲佳景未成具美蒙泉可導絕頂宜臨  
而面勢小差朝晡難審庸費不廣日月非延輿識無不爲  
疑佑獨固請卒事於是雉叢莽呈脩篁級詰屈步灑迤竹

徑窈窕藤陰玲瓏勝槩益佳應接不足登陟忘倦達於高  
隅若處煙霄頓覺神王終南之峻嶺青翠可掬樊川之清  
流逶迤如帶葦役春仲成功秋暮其煩匪病不憊於素開  
雙洞於巖腹當鬱燠而生寒交清泉於巘上遭早暎而淙  
注止則澄澈動則潺湲宛如天然莫辨所洩懸布垂練搖  
曳晴空定東西之方隅正子午之晷度境象一變賓侶咸  
驚矧其流觸灣環曲池齋淪美景良辰賢英迭臻泛方舟  
而騁懷聽清商而怡神寧知景之將曠勝事嘉趣諒難備  
陳遠祖西漢建平侯家於杜陵綿歷千祀佑實虛薄謬竊

公台作相兩朝空尸高秩初過從心之歲即陳歸老之誠  
渥澤猥流皇慈未替特優筋力之禮俯念朝謁之勤任適  
田廬恣尋山水荷天地之大德蒙亭育之厚恩上答何階  
兢慙是積而粉榆之敬恭肅敢虧每出國門未嘗公服導  
從輩悉令簡省芻蕘者莫止唐突及栖弊陋時會親賓野  
老衰宗嗇夫游徼亦同列坐或與銜盃由是盡得歡心庶  
將洽比鄉黨其城曲墟落緇黃童艾杜名杜氏遍周川原  
羣情既用光榮老夫唯增祇懼或曰茲地頗堪遊翫深慮  
勢家凌奪佑以爲不然聖主明君固當制抑神龍中故中



書令韋公嗣立驪山幽棲谷莊實爲勝絕中宗愛女安樂  
公主恃寵懇求竟不之許曰大臣產業宜傳後代不可奪  
也恭惟聖德載在史策貞元中族叔司空相國黃裳時任  
太子賓客韋曲莊亦謂佳麗中貴人復以公主賞愛請買  
賜與德宗不許曰城南是杜家鄉里終不得取仰奉聖言  
布於人聽則二后皆切禁止所冀善以保安在子孫但履  
孝資忠謹身奉法無疑欽達節克守素風復何虞也司徒  
平章事岐國公京兆杜佑記

御夷狄論

秦以區區關中滅六強國今竭萬方之財上奉京師外有  
犬戎憑陵陷城數百年內有兵革未寧三紀矣豈制置異  
術古今殊時乎周制步百爲畝畝百給一夫商鞅佐秦以  
爲地利不盡更以二百四十步爲畝百畝給一夫又以秦  
地曠而人寡晉地狹而人夥誘以三晉之人耕而優其田  
宅復及子孫使秦人應敵於外非農與戰不得入官大率  
百人以五十人爲農五十人習戰故兵強國富其後仕官  
途多末業日滋今大率百人纔十人爲農餘皆習他技又  
秦漢鄭渠溉田四萬頃白渠溉田四千五百頃永徽中兩

渠灌浸不過萬頃大厯初減至六千畝畝腋一斛減少四  
五百萬斛地利耗人力散欲求富強不可得也漢時長安  
北七百里即匈奴之地侵掠未嘗暫息計其舉國之眾不  
過漢一大郡鼂錯請備障塞故北邊妥妥今潼關之西隴  
山之東鄜坊之南終南之北十餘州之地已數十萬家吐  
蕃綿力薄材食鮮兵拙不及中國遠甚誠能復兩渠之饒  
誘農夫趨耕擇險要繕城壘屯田蓄力河隴可復豈惟自  
守而已

改定樂章論

夫音生於人心心慘則音哀心舒則音和然人心復因音之哀和亦感而舒慘故韓娥曼聲哀哭一里愁悲曼聲長歌眾皆喜忭斯之謂矣是故哀樂喜怒敬愛六者隨物感動播于形氣叶律呂諧五聲舞也者咏歌不足故手之舞之足之蹈之動其容象其事而謂之樂樂也者聖人之所樂可以善人心焉古之天子諸侯卿大夫無故不撤樂士無故不去琴瑟以平其心以暢其志則和氣不散邪氣不干此古先哲后立樂之方也周衰政失鄭衛是與秦漢已還古樂淪缺世之所存韶武而已下不達振鐸上不達謳

謠但更其名示不相襲知音復寡罕能制作而況古雅莫  
尚胡樂薦臻其聲怨思其狀迂怪方之鄭衛又何遠乎爰  
自永嘉戎羯迭亂事有先兆其在於茲貞觀初作破陣樂  
舞有發揚蹈厲之容歌有和易嘽發之音以表興王之盛  
烈何讓有周之大武豈近古相習所能思關哉而人間胡  
戎之樂久而未革古者因樂以著教其感人深乃移風俗  
將欲閑其邪正其頹惟樂而已太宗文皇帝留心雅正厲  
精文教命考隋氏所傳南北之樂梁陳盡吳楚之聲周齊  
皆胡虜之音乃命太常卿祖孝孫正宮調起居呂才習音

韻協律郎張文牧考律呂平其散濫爲之折衷西漢以來  
郊祀明堂有夕牲迎神登歌等曲近代加裸地迎牲飲福  
酒今夕牲裸地不用樂公卿攝事又去飲福酒之樂周享  
神諸樂多以夏爲名宋以永爲名梁以雅爲名後周亦以  
夏爲名隋氏因之國朝以和爲名旋宮之樂久喪漢章帝  
建初三年鮑鄴始請用之順帝陽嘉二年復廢累代習黃  
鐘一均變極七音則五鐘廢而不擊反謂之啞鐘孝孫始  
爲旋宮之法造十二和樂合四十八曲八十四調至開元  
中又造三和樂又製文舞武舞文舞朝廷謂之九功舞武

舞朝廷謂之七德舞樂用鐘磬祝敔晉鼓琴瑟箏竽笙簫  
笛篪塤箎丁鐃鐸舞拍舂犢等謂之雅樂唯郊廟九會冬  
至及冊命大禮則辨其曲度章句而分始終之次二十九  
年六月太常奏東封太山日所定雅樂其樂曰豫和六變  
以降天神順和八變以降地祇皇帝行用太和之樂其封  
泰山也登歌奠玉幣用肅和之樂迎俎用雍和之樂酌福  
飲福用壽和之樂送文迎武用舒和之樂亞獻終獻用凱  
安之樂送神用夾鐘宮元和之樂禪社首送神用林鐘順  
和之樂享太廟迎神用永和之樂獻祖宣皇帝酌獻用光

大之舞懿祖光皇帝酌獻用長發之舞太祖景皇帝酌獻  
用大政之舞世祖元皇帝酌獻用大成之舞高祖神堯皇  
帝酌獻用大明之舞太宗文武皇帝酌獻用崇德之舞高  
宗天皇大帝酌獻用鈞天之舞中宗孝和皇帝酌獻用太  
和之舞睿宗大聖貞皇帝酌獻用景雲之舞徹豆用雍和  
之舞送神用黃鐘宮永和之樂臣以樂章殘缺積有歲時  
自有事東巡親謁九廟聖情敦禮精祈感通皆祠前累月  
考定音律請編諸史冊萬代施行

樂府詩集卷之五十五 樂府詩集卷之五十五



欽定全唐文卷四百七十八目錄

崔縱

請諸王母封號奏

停減吏員奏議

杜黃裳

請制內遇祭輟樂制外用樂奏

請遷高宗神主於西夾室議

東都留守顧公神道碑

盧徵

請赴任官以到任日起支課料奏

楊憑

賀老人星見表

唐廬州刺史本州團練使羅珣德政碑

鄭餘慶

請抽京外官俸料修孔子廟堂奏

請定五六品官祭服奏

左僕射賈耽神道碑

祭杜佑太保文

欽定全唐文卷四百七十八

崔縱

縱以蔭補協律郎累拜御史大夫貞元元年加吏部侍郎  
檢校禮部尚書授河南尹徵拜太常卿封常山縣公七年  
卒年六十二贈吏部尚書諡曰忠

請諸王母封號奏

謹按司封令及六典王母爲太妃高祖宇文昭儀生韓王  
元嘉後爲韓國太妃太宗燕妃生越王貞後爲越國太妃  
今諸王母未有封號請遵典故

金史卷之五十一  
卷四十七  
二  
停減吏員奏議

伏以兵戎未息仕進頗多在官者既合序遷有功者又頒  
褒賞比來每至選集不免據闕留人嘗歎遺才仍招怨望  
況有恩詔甄錄功勞諸道敘優人數甚廣見須處置不可  
稽留今若停減吏員實恐未便於事非但承優者無官可  
授抑又敘進者無路可容本冀使人翻成斂怨事仍舊貫  
以適時宜更待事平然後輕度

杜黃裳

黃裳字遵素京兆萬年人第進士又中宏詞科累遷侍御

史貞元末拜太常卿憲宗爲皇子監國拜門下侍郎同  
中書門下平章事和二年以檢校司空爲河中晉絳節  
度使封邠國公三年卒年七十一贈司徒諡曰宣

請制內遇祭輟樂制外用樂奏

禮云喪三年不祭唯天地社稷周禮黃鐘之均六變天神  
皆降林鐘之均八變地祇咸出不廢天地之祭不敢以卑  
廢尊禮也樂者所以降神也不以樂則祭不成今遵遺詔  
行易月之制請制內遇祭輟樂制外用樂

請遷高宗神主於西夾室議

自漢魏已降沿革不同古者祖有功宗有德皆不毀之名也自東漢魏晉迄於陳隋漸違經意子孫以推美爲先光武已下皆有祖宗之號故至於迭毀親盡禮亦迭遷國家九廟之尊皆法周制伏以太祖景皇帝受命於天始封元本德同周之后稷也高祖神堯皇帝國朝首祚萬葉所承德同周之文王也太宗文皇帝應天靖亂垂統立極德同周之武王也周人郊后稷而祖文王宗武王聖唐郊景皇帝祖高祖而宗太宗皆在不遷之典高宗皇帝今在三昭三穆之外謂之親盡初主入廟禮合迭遷藏於從西第一

夾室每至禘祫之月合食如常

東都留守顧公神道碑

昔康王以成周之眾命畢公保釐東郊承二后之業周禮以天官卿爲冢宰漢以大司馬爲將相國朝以尚書僕射師長百揆此四者人臣之極公盡更之有不至追而命之公之德盛矣公諱少連字夷仲吳郡人也夏后少康以禹葬會稽次子爲越王以主祀漢封其裔孫爲顧侯纘禹之緒厥後蔽蔓世居河南中原戰爭復徙吳會自晉司空和洎梁給事中耀至公十三代矣衣冠禮樂爲江左著族曾

王父諱君卿晉朝柳州司馬大父諱克忠縉雲郡司倉參  
軍贈邠州刺史烈考諱望贈祕書監祕書府君慕梁伯鸞  
於陵仲子安貞履道不辱其身該通六經旁貫百代究天  
人之際盡性命之端公蘊山岳粹靈承祖考休慶瓌姿偉  
度識達行方志存遠大道契先覺每躬率耕稼厲精墳典  
齒列上庠升堂覩奧時小宗伯薛公邕深所歎異以爲東  
南之美盡在廊廟之器不孤擢進士甲科猶謝詩人錯薪  
之義丁祕書府君憂居喪柴毀殆至滅性既祥而哀未忘  
也久之以書判高第典校祕文秩滿授登封一簿時議以



皇居在鎬砥名之士登近司者俗不爲東畿殊不知樂嵩  
少之遊奮鴻鵠之翼然木然有暴虎公以爲天道可以誠  
感猛鷲可以仁服乃擲而出第移檄靈岳於是人安其居  
獸不爲害其通理遂性也如是及休告東洛居守鄭公叔  
則辟爲從事非其所好終以疾辭其明年書判超絕登第  
亞相于公頌推義行詔拜監察御史京師內亂鑿輅時巡  
公節見艱危步至行在陳少康滅澆之計墨翟設拒之宜  
帝納其忠拜水部員外郎翰林學士隨難南梁遷禮部郎  
中加朱紱銀綬學士如故贊絲綸之密命參帷幄之謀猷

屢獻嘉言克昌大業乘輿反正酬勞計功退保謙沖口不言祿以東吳播越叶於方墓表求遷奉辭志哀懇德宗以公職在近署重違其請乃命長男主喪中使監護水陸縣道斂襚之飾悉令仰給葬於偃師縣高邑鄉邙山之趾澤漏泉壤哀榮莫儔尋以本官知制誥賜金印紫綬遷中書舍人公在翰林僅將一紀富平以周密自制萬石以謹審見稱故造辟而言詭辭而出讜言碩畫人莫得聞帝深嘉之方將大任以文昌理本厯試其能凡三踐列曹再登八座一爲散騎常侍一爲左丞雖分職各殊領者數矣公之

在地官也辨土地之名物稽夫家之眾寡四人不瀆五教  
允敷斂施以時貴賤以節所以法通制而濟經費也公在  
秩宗明典禮以正威儀變樂府而和上下錯綜經術辨論  
俊造黜浮僞而尚敦素所以觀人文而化天下也公在天  
官綜六典以佐邦理糾八柄以馭羣司登降庸勲權衡流  
品抑貪冒而進賢能所以代天工而立人極也珥貂騎省  
以直方備顧問以謇諤處朋儕時有權臣怙寵人多附麗  
公面折其短數而絕之羣臣爲危正色不撓旋持左轄旁  
總機曹之事凡三典賓貢三掌銓衡藻鑑表於知人清通

播於令問萬邦輻輳五都浩穰命公尹京兆以爲設鈎距  
塗赭衣前人之所爲不足以爲四海式於是布和平尚簡  
易始務仁人之惠無取赫赫之名公大體去有餘慕遷  
吏部尚書復行太宰之職轉兵部尚書兼御史大夫東都  
留守處納言之位儀亞相之府行二南之化申九伐之威  
以洛苑間田汝墳曠土乞田積粟務稽勸分貞我律師載  
清東夏孟元陽有激水之功爲當時所揜公密薦於先帝  
言雖不成識者美之嗚呼昭假其功馨香其德宜升玉鉉  
而底太階天不憖遺梁木斯壞以貞元癸未年十月四日

薨於洛陽崇讓里之私第春秋六十三都人罷市而洒泣  
皇上廢朝以興悼乃命有司葬日給鹵簿簫鼓追贈尚書  
右僕射飾終之義備矣太常考行諡曰敬夫人同郡陸氏  
常州司馬綺之女也蘊中饋內弼之美女儀之德宜配君  
子光我閨門石窳未封先公而謝有子曰師閔克家光烈  
早歲繼明以拔萃甲科歷咸陽尉次曰師安太常寺太祝  
次曰宗彧宗憲志文好學不墜先業凱風之思有感人聲  
師閔等考卜先遠以明年二月十五日奉公泊夫人之裳  
帷合葬於亳邑附先塋禮也以黃裳陪南宮之班列接西

金定全唐文 卷四百七十六  
掖之周行忝於史官頗知系錄敘事詢于故老銘德存于  
碩儒追琢豐碑永播徽烈

盧徵

徵范陽人歷殿中侍御史度支員外郎信州長史遷給事  
中出爲同州刺史徙華州

請赴任官以到任日起支課料奏

內外官應直京百司及禁軍并因親勒留官等若敕出便  
帶職事及勒留京官即合以敕出爲上日外官以敕到爲  
上日如今司未經奏聞即合同赴任者例準貞元六年二

月二十四日敕待甲出後省符到任日支給俸料者若甲出未帶勒留宮簽符先下州府支替理例未免喧爭伏請起今以後並須挾名勒留敕到任方爲上日支給課錢其附甲官有給脚依前勒留直諸司者待附甲後簽符到州爲上日支給課料冀塞僥求庶絕論訴

楊憑

憑字虛受一字嗣仁號州宏農人第進士累官太常少卿湖南江西觀察使入爲左散騎常侍遷刑部侍郎京兆尹貶臨賀縣尉

賀老人星見表

臣某言伏奉太史奏昨八月十五日夜壽星見奉敕宜付所司者伏以三光在天垂象以昭德一人御宇應運以發祥將後天而奉時遂瞻星而稱壽九星納慶萬福同歡中賀臣聞聖人握乾以繼統輔德以垂休則必焜耀耿光昭宣景福歷考圖牒皦然明徵謹按孫氏瑞應圖云老人星見人主壽昌陛下丕承寶歷光宅天下恢宏聖烈允執大中化成而天道不遠感至而星精介祉是以去歲已出今秋又見光靜而明當井絡之端色黃而潤叶中方之位降



茲靈貺實契福庭帝圖表無疆之休史冊傳萬祀之慶臣  
生逢聖代幸覩昌期限以藩鎮守土不獲奔詣闕庭稱賀  
北望宸極倍萬恒情

唐廬州刺史本州團練使羅珣德政碑

王者法天地之治贊其化育者其惟循吏乎羅公牧廬江  
七年政洽化淳遷領壽陽州之耆老韋挺等永惟州尊鞠  
我覆我之德若非搢紳先生之言刊他山之石令一郡之  
人入則瞻之出則望之則何以塞戀慕之思邪於是同心  
上請遂降中詔謂憑嘗載筆右史請述徽烈公珪璋秀特

奕葉蟬冕曾祖彥榮皇朝同州長史王父思崇韶睦常三  
州刺史烈考懷操桂州興安縣令世以文學政事揚歷清  
貫淮海之郡廬爲大封畧濶而土田瘠人產寒薄井賦尤  
重公由奉先令而牧是邦性嚴而不殘和而不流仁可以  
育物得衆智可以豐財成務勇可以蕩邪去暴寢處冉季  
之政馳騁游夏之藝廬江之俗不好學而酷信淫祀豪家  
廣占田而不耕人稀而病於吏衆藝桑鮮而布帛踈濫有  
札瘥天傷則損敗生業捨藥物而乞靈於鬼神公則禁其  
聽神頌以良藥爲求十全之術以救活之令春無瘡寒夏

無瘠首之疾又命鄉塾黨庠緝其牆室鄉先生總童冠子弟以淹中之禮田何之易上代帝王遺書與魯春秋及百王之言以教之圓冠方屨者不補吏不及數歲俊造之秀升於宗伯者僅四十人又命有不耕之田有能興耒耜者聽耕之所耕之田因爲之主墾田滋多歲以大穰每里置里胥一人而止餘悉罷之至定賦之際集人正坐衆議其重輕里胥書于籍而無得措一辭焉是以賦均而無銖兩之差勸之藝桑以行賞罰數年之後環廬映陌如雲翳日易其機杼教令縝密精龕中數廣狹中量鬻之闌闐而得

善價人以不困郡至每歲四時呈課屬邑之聯事定其遲  
速美惡而殿最之務繁勞人無寧止權寵之黨因而強巧  
公命縣人夫守清靜之化四時無得離邑唯歲終一至郡  
計事人樂易簡之理咸思自言澤國沮洳水滂不時郡城  
崩剝勞於版築百堵興役則竭作齊人公命州兵食公之  
糗糧者度其力役多少加給僦功緡錢尋尺摧闕隨補隙  
壤不聞磬鼓而百雉常峻三代盛王曾不遺年聖朝立制  
高年者給侍丁以遵前古養老之道長吏不能遵行令典  
以垂空文公因班春行部宣明詔旨當侍白髮者捨其百

役覲齒知感荷其生成軍興以來賦役差重錢貴貨賤罷  
忙不堪悉輸緡帛黔首重困公命一郡所出之貨人皆得  
而輸之其上者貢于王府其中者入于方帥其下者以充  
郡守羣吏之稍食焉人人自便吏無侵害其厚風俗去疵  
癘勤力愛人興利除害不至於嚴而人從化故有生說於  
其下和氣應於其上則有靈芝瑞雀無情而產重葩三秀  
煌煌可愛子喙皓質其儀可喜宜其超賜金增秩之寵以  
備公卿之闕所以擢階品第五書考課第一徽章命服之  
美恩錫叢至天子以壽春右郡淮海內屏地雄人富東南

金匱全書卷之四十一  
樞轄有介馬數百徒兵萬人詔公爲壽州刺史本州團練  
使轅門洞開貔虎泱泱朱綬貝冑金龜紫艾銀鈿寵荷恩  
視方伯壽春抵廬江三百里公嘗故蹟觀命人望而愛之  
赤幃即露壽人自理俄有詔命羅珣前爲廬江  
政事居最惠養贍助一邦至中司執法外督州部可兼  
御史中丞其宰奉先也封畿千里斯邑爲大墾田之數二  
萬頃每歲引芻粟之車九千兩公布政有條事皆肅給邑  
有園寢多充奉之勞中貴人率常旁午有怙勢憑寵之吏  
慢公法公箠殺之強家惡子散落他邑政成四稔去而

見思邑人芝等相與詣闕請刊金石公之佐嗣曹王臯也荆門漢上之理和門之政軍司馬馬彞主之郡邑之政而公主之征南日登峴首命賓友有成璿坐嘯之逸言理行者甲于他邦其後屬帥歿兵亂人胥大恐公從容指揮燿其同惡軍壘和靜不知有兵在奉先日天子聞公樊漢丕績理乞殊化召入明廷咫尺慰勉其任理官吏京縣尉甸服也芝有勤績稱於官司可謂終始不回宜享榮號者矣頌曰芝食人餘世芝田餘芝公

公未至止郡無典刑賦集役煩人豈樂生有里不居有田

不畊法禁廢弛游人縱橫鄉有疾癘乞靈捨藥邑有黨庠  
不學將落貧人稅重豪家賦薄田稀翳桑猛虎爲虐自公  
來思經教大開墾彼荆榛化爲莓苔隘關溢廛萬商俱來  
罷吏息人老安少懷提封之內邑無曠土游手滅跡藝桑  
畝畝青衿圓冠宛若鄒魯貧均富斂祛其疾苦時或札瘥  
害及于人頒以良藥絕其聽神網寬禁疎有制有倫出入  
阡陌心勞體勤有獸不搏由公服馴皇奪良牧彼肥之曲  
遷臨壽春朱英暢轂撫我何儉舍我何速願公壽考享有  
百祿瞻是豐碑慰彼惇獨



鄭餘慶

餘慶字居業鄭州滎陽人  
大歷中進士貞元中拜中書侍郎  
同中書門下平章事貶郴州司馬  
順宗立以尚書左丞召憲宗朝復以本官知政事  
罷爲太子賓客累除太子少師封滎陽郡公  
穆宗立進位檢校司徒卒年七十五  
贈太保諡曰貞

請抽京外官俸料修孔子廟堂奏

請京見任文官一品以下九品以上及外使兼京正員官者每月所請料錢請率計每貫抽一十文以充國子監修

造先師廟及諸室宇繕壁經公解雜用之餘益充本錢諸  
色隨便宜處置臣以爲歷事文吏無非孔徒所取至微足  
以資學教化之根本人倫之綱紀陛下文德武功勦亂除  
暴事超歷代道貫百王國學毀壞荒蕪蓋以兵戎日久而  
修葺未暇也今寇難滌蕩天下砥平爰俾耆臣叨領儒職  
臣兢於受命敢不肅恭伏念旬時莫過於此伏望天恩便  
賜允許仍令戶部每月據數並以實錢付國子監具東都  
留司京官亦準數率錢便充東都國子監修理

續續請定五六品官祭服奏

內外官服朝服入祭服者其中五品多有疑悞約執事宜  
自今已後其執事官是五品者雖帶六品已下散官即有  
劔珮綬其六品以下職事官縱有五品已下散官並不得  
服劔珮綬

左僕射賈耽神道碑

公諱耽字敦詩其先長樂人也七代祖元楷因葛榮之亂  
避地始徙家於浮陽隋開皇中改浮陽爲清池今爲清池  
人也烈祖遠則皇德州長河尉祖知義皇沁州沁源主簿  
贈揚州大都督考炎之贈尚書左僕射皆才光道溢器位

非偶積善有遂鍾於魏公公天寶十載明經高第乾元中授貝州臨清尉州縣之職與公非宜兵戈甫興時不韜才公詣闕獻書授絳州太平尉太原節度王思禮察公器重識高涵泳萬頃署度支判官轉試左驍衛兵曹試大理司直監察殿中侍御史職並如故遂遷檢校繕部員外郎兼太原少尹侍御史北都副留守仍賜金章紫綬就加檢校禮部郎中凡歷數使賓待益重奇才愈茂宏器日彰天下士君子推公爲棟梁遷汾州刺史在郡七年憚怛之愛忠利之教序四器導五常百姓日用而不知熙然致於仁壽

烏足語其瑣細歟徵拜鴻臚卿兼左右威遠營使通夷狄  
之情序賓客之位其有素矣是歲拜梁州刺史兼御史中  
丞山南西道節度觀察度支營田等使加朝議大夫封廣  
川男時守臣梁崇義恃漢水峴山之險負固倔強公受詔  
領麾下沿江東討降均州屯穀城所向皆捷以功加銀青  
光祿大夫上以慎理軍旅以信夷夏邊封謚清而百姓宴  
安是時故山南西道節度使相國鄖公震洎邠寧節度使  
張僕射獻甫或爲部刺史或爲都將皆雄毅宏達常流不  
及忌能飛語危疑是懼軍帥之例罕有全度公前推信誠

中發坦蕩咸以事曉加之慰薦竟垂忠勲兼佩將相引張  
推轂受脰微公之恢朗洞識二人曷能臻歟在鎮三年遷  
檢校工部尚書襄州刺史御史大夫山南東道節度觀察  
使會李希烈亂常朝廷致誅詔公爲司徒梁公勉招討副  
使以公懿德瓌姿不宜爲副寇難未平徵拜工部尚書職  
崇喉舌望允台鼎俄以本官兼御史大夫東都留守判東  
都尚書省事充東都畿汝州都防禦使又加東都畿唐汝  
鄧州都防禦觀察使舊例居守不出王城公以射藝絕倫  
氣橫秋霜德宗知公信在言前優詔特許薄狩郊甸允所

謂珪璋特達之德也遷檢校尚書右僕射充義成軍節度  
鄭滑等州觀察處置等使屬有鄰師戍兵護邊魚服鷁冠  
異軍三千公弛柝罷言門闢洞開處其未安重延廊廡坦  
易信誠挺出今古海山峙茫茫屹屹培塿吠澮安得不  
服其洪濤峻嶠歟凡更四鎮踐履如一尋以風疾懇形封  
章御札名方與十全之醫馳賜不允陳讓俄而獲瘳貞元  
九年入覲拜尚書右僕射同中書門下平章事朝廷爲之  
寶巖廊爲之重天下以之信向蠻夷以之懷來加金紫光  
祿大夫轉左僕射依前平章事遷檢校司空依前左僕射

平章事遂嬰風疾四表陳讓不俞朝旨御醫盈門中使埴  
路嗚呼有盛衰也有晝夜也聚散之理常也死生之變大  
也愚智同塵賢不肖共轍孰能究之哉公爲御史先府君  
追贈太子中允先夫人鞠氏贈東萊縣太君歸本郡遷葬  
鄉邦榮之先府君累贈尚書左僕射鞠太君贈齊國太夫  
人祖贈揚州大都督祖妣崔氏累贈博陵郡太夫人廟貌  
觀德豐碑紀烈奉君親而載劬啟手足而免土始卒之道  
侯其躋而以永貞元年十月一日薨于長安福里之私  
第享年七十六輟朝四日再贈太傅詔鴻臚卿渾鏐持節



備賻絹一千匹米粟一千石詔葬長安高陽原夫人贈扶  
風郡夫人武功蘇氏駕部郎中守忠之孫處士珣之女先  
公二十五年而歿至是而合葬焉秉周禮也長子疇太常  
寺協律郎凋于青春次子隣太子議郎少子暉京兆府參  
軍公好古在汾州時於戒行尼寺家童院得晉西河王司  
馬斌碑太康中尚書郎索靖八分書翳薈蕪歲之下字可  
辨者猶存大半有割太原四縣以爲邦邑之語公再建於  
寺殿之前爲尚書時魏懷鄭汴軍聲未輯詔公宣遏而兩  
家之難解抑推君命且曰服寬信也公翫習經籍老而不

倦九流百氏靡不該覽通夷裔之風俗盡山川之險易歷  
代沿革之自百王廢置之由關塞通塞之因牧圉盛衰之  
異道程疎密之準要荒享獻之數聚米畫沙成於指掌矧  
大丹青神化縑緗纂述數十年來西戎陷我河湟其圖籍  
志錄泯絕散落非公強力精專蹂躪貫穿靡書不探雖賤  
必訪則自汧龍而西傳疑唱謬紛紛不已已化爲草昧天  
意若曰降公之聰達精博拯厥將墜歟興元元年詔公撰  
國圖貞元十四年先獻關中隴右及山南九州等圖又撰  
別錄六卷吐蕃黃河錄共四卷優詔褒異賜馬一匹銀器

數事錦綵三百匹十四年冬撰海內華夷圖成并撰古今  
郡國縣道四夷述四十卷貞元十道錄四卷賜馬兩匹銀  
器數事錦綵五百匹又內山銀槥二蓋殊渥也於戲渤海  
左涌共河前激洪漭其地氣必將有以孕育哲聖謨明盛  
時爲紀爲舟爲棟爲梁體貳爲仁萬夫之望豈特河海地  
理云乎哉亦將上動昭回下降星精爲忠爲孝爲聰爲明  
爲君子爲宏器公有大度容物也浩無津涯而恪慎兢畏  
不有怠也有明哲保身也孰云肯綮而端方肅祇未嘗離  
也公奉親以孝事主以忠待天下以信博識以強力廉隅

以砥礪居台座十三年秉戎律四鎮垂十五年產不過中  
人日給有不暇之意非夫脫落塵機翔翔青冥孰能然哉  
夫郤縠之說禮樂敦詩書祭遵雖在軍旅不忘俎豆邴吉  
之不過汙丞相車茵劉寬之無爛汝手叔度之涯涘元陽  
之不伐衛玠之理遣情恕公咸頡頏博得其兼備者已  
公考求六藝張弓挾矢允謂殊倫連墮冥冥之羽雙貫五  
采之翬殪殞豕之獸圖畫歌詠噫嘻君子多乎哉文章之  
製博達而清約盛矣著述有未就者歿有遺恨嗚呼守知公  
與餘慶有忘年之眷見託紀徽烈俾鴻伐芬芳不歇表唐

得賢臣之目焉銘曰

圓方既明淪渾粹精辰耀騰溢降爲賢英郁郁魏公薰然  
淑清脫落瑣細曾吞長鯨天寶之季北塵薦起懷策上謁  
言塵可止少年下位事不行矣命官絳臺渥澤伊始車騎  
開府司空晉陽萃賢揚幕優游抑揚惟公聳然落落堂堂  
羣議乃曰允膺巖廊剖竹西河眾蘇情結風俗丕變載欣  
載悅六鈞服猛雙鴻一發式是威武泚泚烈烈入掌九賓  
羽儀清都四夷荒職貢畫地圖帝曰漢中實惟爾區廷授  
龍節雙旌碩儒推轂漢南乃司冬官保釐成周白馬登壇

更踐數鎮撫人以寬或三四年遂成勝殘後弼中樞朝廷  
爲實謀不外揚功宣造膝與物宥過意工言質天下日用  
曷由窺室知命兮死生齊松楸列兮埏塿成蹊海曾兮渾  
渾浩浩一指兮天和倪謬知言之重顧銘樂石兮悽悽萬  
物或幾已息兮惟公德兮竟躋

祭杜佑太保文

維元和八年歲次癸巳四月癸未朔九日辛卯銀青光祿  
大夫守太子太保兼判太常寺事鄭餘慶銀青光祿大夫  
守兵部尚書王昭銀青光祿大夫吏部侍郎楊於陵中大

夫守戶部侍郎判度支盧坦朝議大夫守刑部侍郎充諸  
道鹽鐵轉運使王播朝議大夫權知禮部侍郎韋貫之等  
謹以清酌之奠敬祭于故太保贈太傅杜公之靈伏惟嶽  
峙毓德台符炳靈實啟邦傑佐時文明厚仁保和待物推  
誠夷道不隔直心無營允釐羣官參歷庶務周旋四朝出  
入三署顧言慎行道在忠恕絪組外身江河比度始從郎  
位職典邦賦重人惜費惠恕周布建中之初受命分符報  
政長川擁節番禺越俗蠻貊是訓是濡既撫淮楚遂荒隋  
都時當徐方倣優爲虞截河鑿流擁滯邦輸統以威重簡

于帝俞鎮寧二境並建雙旟十萬驅虎指揮風趨任兼文武志尚詩書兵賦著典郡政來蘇學該地理識究元機天寵載加時問逾積聿來登庸作弼邦國邦計攸掌國機畢畫永貞之際宮闈秘隔順皇沉疾奸臣竊職公聽羣位總已夕惕躬宣詔旨捧授金冊一人出震羣邪蕩滌崇秩屢增湛恩備錫朝登劔履樂侔金石沐澣良辰宴慰親客朱輪紫綬富盛赫奕戒足思退居高不危國有大計猶將來咨才實不器用皆適時位極元老守逾謙卑靈壽方賜懸車忽辭冀期頤以遐保遽樂往而哀隨餘慶等早忝班行



嘗承顧盼仰台庭以增欵臨素車而申奠嗚呼哀哉伏惟  
尚饗



欽定全唐文卷四百七十九目錄

呂元膺

封還授孔戡衛尉寺丞分司東都詔奏

驃騎大將軍論公神道碑銘 并序

鄭雲達

奏弟方達不孝狀 改和奏

唐故劍州長史贈太僕少卿汝州刺史隴西李公

神道碑銘 并序

裴堪

請祀嶽瀆親申拜禮奏

許孟容

停齊總為衢州刺史敕命表

請再令憲官驗祖好時奏

夏旱上疏

德宗神武孝文皇帝諡議

順宗至德大聖大安孝皇帝諡議

穆公集序

唐故侍中尚書右僕射贈司空文獻公裴公神道

墓定全碑銘 并序

祭楊郎中文

元康守景夫彭國公人處少時景賢自為弟貞

右司員外郎出

太子賓客元

村

北

每

目錄

得孫德為衛州刺史敕命表

臣等謹言奉命下獄知時

臣等謹言

臣等謹言

臣等謹言

祭慰伯中文

祭慰伯

祭慰

欽定全唐文卷四百七十九

呂元膺

元膺字景夫鄆州東平人建中初策賢良高第貞元朝拜  
右司員外郎出爲蘄州刺史憲宗朝拜吏部侍郎以疾改  
太子賓客元和十五年卒年七十二贈吏部尚書

封還授孔戡衛尉寺丞分司東都詔奏

孔戡以公爲盧從史所忌且離職已久李吉甫以宰相出  
鎮辟請非涉嫌疑推類言之河陽節度行軍司馬楊同慈  
史官崔國楨或處近職或倅戎府皆爲吉甫奏在幕庭從

史以嫌忿于黷朝典豈可曲徇其志且孔戡官序雖非黜  
退但因此改易則長奸邪之心臣恐忠正之士各懷疑慮  
事不可許

驃騎大將軍論公神道碑銘

并序

公諱惟賢字惟賢其先西土人也高祖諱東贊作相于西  
戎因宮立姓遂爲論氏貞觀中威懷四夷翦滅北虜蕃戎  
欵附萬里獻琛慕嚮華風欲爲和親延頸企踵心馳闕下  
太宗皇帝覽其誠至遂許之公主時戎王遣相東贊爲使  
來迎不忒其儀不愆於素召見顧問進退合旨詔以瑯琊



公主外孫女妻之東贊自陳以本國有妻又以贊普未謁  
公主陪臣不敢先受殊寵太宗嘉之又奇其對撫以厚恩  
遂有歸化之心曾祖陵與祖躬仁同總衆于東至高宗朝  
拔部落七千餘帳歸國拜特進左玉鈐衛大將軍封歸懷  
郡王褒忠獎誠寵錫殊厚子孫因家自銀州至于京兆祖  
躬仁朔方副大總管雲麾將軍行左驍衛大將軍酒泉郡  
開國公贈撥川郡王諡曰忠自高曾至大父皆有勲烈著  
于當時父誠節朔方節度副大使開府儀同三司右金吾  
衛大將軍知階州事武威郡王賜太子太傅天寶季年安

祿一作逆塵起山東上皇省方於巴蜀肅宗巡狩于朔陲  
危亂之時見其臣節帥子弟及家僮以牧馬千駟罄其財  
用以奉禁旅公少有志尚奮身轅門隨先父統其士馬與  
元帥哥舒翰犄角扞寇鋒刃既接大小數十戰摧陷堅陣  
洎王師失御以智信保全所領之軍馳于靈武扈從肅宗  
與先父洎乎昆弟立勲成效不可備述至德中授壽府典  
軍次授左衛郎將賜紫金魚袋俄轉左監門率又遷左領  
軍衛將軍又特進右領軍衛大將軍西平郡開國公食邑  
三千戶元勲之允受茲光寵先時代宗皇帝爲天下元帥

求武勇之士公與兄懷義惟真同爲先鋒討擊使又領部  
落數千人鎮岐陽縣披堅執銳一月三捷洎除兇清亂至  
上元二年授特進行大光祿兼右領軍衛大將軍充鳳翔  
節度副使馬軍兵馬使寶應中丁艱茹荼朝廷以金草從  
權由斯奪禮廣德二年授開府儀同三司殿中監充劍南  
節度副使大厯中受開府儀同三司太常卿上柱國進封  
成國食邑三千戶旋受渭川節度都知兵馬使公以從戎  
歲久雖齒髮未衰而疾疢屢作代宗寵其勲舊詔許還京  
仍全祿賜同大將軍俾其優閒建中末德宗遷幸巴梁公

以所疾沉綿不獲扈蹕逆臣朱泚迫以兇威不變其志雖積年之疾累日而瘳貞元十五年授驃騎大將軍行左武威衛將軍上柱國公斯實朝廷獎舊勲矣止足求退俄以本官致仕中使就問寵秩有光元和四年七月十日寢疾終於靜恭里之私第以某年十月一日塋於萬年縣洪固鄉之古原故夫人太原王氏祔焉詔給鹵簿鼓吹所以褒寵也嗣子輔鼎同州白水縣丞次曰侗常州江陰縣尉次曰倣右領軍衛騎曹參軍泣血茹荼存無改之義公之季弟惟明爲時英髦文武備用建中興元之際仗義討逆摧

殄兇徒勲彰險艱謀著忠益貞元初以太常伯執金吾授  
鉞渭北八座互相崇獎忠功元膺獲佐戎幕備閱忠義由  
是盡知公之世業勲德矣銘曰

大忠之允本自西土奕世崇勲旣明且武在太宗時有道  
攸覩洎夫撥川緒業光輝天寶季年塵起幽燕自興其家  
殄寇功全乃拜公侯寵榮無替用表豐碑昭于東裔

鄭雲達

雲達滁州刺史驴子第進士德宗朝擢拜諫議大夫遷禮  
部侍郎為李晟行軍司馬元和初終京兆尹

奏弟方遠不孝狀

方遠受性克倖不知君親眾惡備身教訓莫及結聚惡黨  
江中劫人臣亡父先臣昬杖至一百終不能斃張延賞任  
揚州日亦曾犯延賞法決殺復蘇至于嘗言皆呼臣亡父  
先臣名親戚所知無可教語昨聞於邠寧慶等州干謁節  
度使及州縣乞丐今見在武功縣南西戎附近恐有異謀  
若不冒死奏聞必恐覆臣家族

唐故劍州長史贈太僕少卿汝州刺史隴西李公

神道碑銘

并序

夫蹈道而不獲乎上育德而不尊其位有之矣在西漢有

東海于公在東漢有闕五其闕一也闕一範闕一福好德

闕二乃知道者善之闕一德者福之闕一苟茂其道豐其

德而福不在乎其身必鍾其後嗣稽之行義質諸聖暮闕一

字德於闕一陳者李公其人矣公諱廣業字隴西成

紀人也惟我景皇帝仕魏八柱國唐國公公五代祖也若

后稷肇封將嗣八百之運闕一海州刺史亮惟我神堯皇

帝受昊穹靈命行敦敘之典追封鄭王贈司空公高祖也

若夫闕一沒廿方受勾闕一之闕一皇朝闕三行臺尚書

次定全唐文 卷一百一十一 鄭雲達

闕一州牧淮安王神通公會祖也若毛畢佐周翦商功參

十亂皇朝左驍衛將軍淄川郡王李同公王父也闕一皇

太后臨朝闕一朱虛闕一祿闕一之竊威闕一平闕一以

定國皇朝雲麾將軍遂公之烈考也原夫至道元氣之化

成也融而為川澤結而為山阜崇功大業之闕一美也散

而為英雄聚而為哲賢惟公祖曾盛烈昭配上元儲孕福

裕鬱生才彥闕二中庸闕三知闕二服膺一善以闕二能

年踰弱冠闕五天子有事于郊丘宗室陪位國慶覃恩釋

褐授寧州參軍闕一而就列非闕三後以序遷左威衛闕二



參軍右金吾衛闕字曹參軍許州扶溝縣丞右羽林司

階陝王府典軍渭州別駕劍州長史闕字用體道冲讓闕字

聞政闕字服闕字抱關之祿故闕字百轍自退焉珪組

貴胄對有慙德本仁為行施之則誠於君為忠在親為孝

歲丁雲麾憂闕字節力能闕字滅性甘淡闕字人無

所加洎府就禮經衣裳外釋蒞官居處動思揚名敬慎膚

體歸於闕字鄉里過於刑賞信闕字朋闕字非久要公以

微言既絕是非莫分春秋經旨仲尼所志三代之禮家分

糅雜淹中之說最符孔氏故暢闕字旨義成一家師法

欽定全唐文 卷一百三十一 鄭雲達

闕二 情性闕二 樂道以開元十八年八月二日終于劍州

官舍春秋五十有一以其年十二月遷祔于京兆府三原

縣闕一 原鄉之北原先塋禮也嗚呼以公之成德也宜其

臻闕二 登闕一 位而年屈中壽位窮綱佐仲尼有喪子之

歎其在茲乎厥後闕二十 少卿闕一 州刺史嗚呼生得天

爵之貴歿有廟享之尊盛矣哉闕里之闕一 也公之元子

皇戶部尚書河東朔方六道節度都統闕二 間秀風

雲毓德當莽卓盜國之際總齊晉勤王之師隱如長城克

固磐石次子若水皇金吾衛大將軍兼闕一 舍人闕九 巡

禁衛玉帳增威宣導王言彤庭讓德公之元孫錡即地官  
之家嗣也今任浙江西道都團練觀察處置及諸闕一字鹽

鐵轉運等使銀青光祿大夫檢校禮部尚書使持節潤州

諸軍事潤州刺史兼御史大夫天挺俊哲才為時生承先

王不構之闕一字賒燕翼無窮之烈出作藩垣入為柱石總

權筦轉輸之任巨吳楚服嶺之封事絕爭承賦皆合徹利

澤浹天下衣食贍闕一字歸闕一字蕭闕五字河內闕六字惟皇祖

懿德為代師範琬玉未刻光靈不揚謂雲達嘗學舊史庶

聞前修故纂闕一字緒業闕二字銘表其詞曰

關十 憲憲李公稟氣冲清涉世居厚閑邪性情關一仁為字

重撰德無形負之致遠克舉而誠服膺中庸樂關四言關二

字 忠孝關一致書關五當味隱霧豹文瑞時麟趾德猷福

履翼子謀孫祉流道廣慶兆高門光光前烈顯顯後昆于

關一 定國陳類長關一于陳伊何關二而盛惟關二之奕

代流慶後之二葉俱登八命官同曳履職傳戎柄樹官貽

遠厥配孔明至德參化蒼穹關一禎封表關二榮耀佳城

刻頌貞石將來作程關一

裴堪

堪增司空耀卿孫貞元初官禹年尉調太常博士終江西  
觀察使

請祀嶽瀆親申拜禮奏

謹按舊儀嶽瀆以祝版御署訖北面再拜證聖元年有司  
上言曰伏以王者父天母地兄日姊月於禮應有再拜之  
儀謹按五嶽視訖天之禮其日月以上請依舊儀五嶽以  
下署而不拜制可開元修理五嶽四瀆皇帝無親祭禮  
儀其祝文皆云嗣天子某謹遣某官敢昭告於某嶽某瀆  
之神讀訖皆申再拜祭五龍神但云獻官再拜此則有司

行事皆有拜文今臣與禮官等通詳典制整辦所宜伏聞  
禮擬於時議則求古無文可質正者則推類以明之臣愚  
以爲三才之尊各申所極尊有所統禮亦宜差若無比視  
卽以辨等故禮云五嶽視三公四瀆視諸侯其餘山川視  
伯子男議者以岳瀆旣比公侯則禮如人臣矣其於祭也  
則人君不合有拜臣之儀謹按五經通議云星辰日月五  
岳四瀆皆天地之別神從官也因郊而祭者緣天地之意  
亦欲及之也又禮記云非其臣則答拜鄭元注云不臣人  
其臣也則星辰嶽瀆旣是天地從官恐人君不得如公侯

之禮而臣下之也何以言之王者父天母地兄日姊月星辰視昆弟嶽瀆視人以此明之星辰嶽瀆是天地之臣也秩視人臣也陛下與天地爲子遣使申祭恐不合令受天父地母從官之拜宜有以答之故開元禮祭岳瀆祝文皇帝稱名又云謹遣於義有必拜之文是國家著禮以明神爲敬不以臣下爲禮以臣等所見並請依證聖元年定制有司行事須申拜禮

許孟容

孟容字公範京兆長安人舉進士甲科又第明經授校書

金定全唐文 卷四十一 九  
郎累拜太常少卿憲宗朝遷尚書左丞拜東都留守元和  
十三年卒年七十六贈太子少保諡曰憲

停齊總爲衢州刺史敕命去

臣伏見今日恩制除衢州刺史齊總臣竊有所慮恐驚物  
聽不敢關下陛下比者以兵戎之地或有不獲已非次擢  
授者今衢州無他虞齊總無殊績忽此超授羣情驚駭又  
齊總是浙東判官今詔敕稱權知浙東觀察留後攝都團  
練副使向前未有敕命今便用此下詔猶恐不可齊總若  
可選拔不假此事若夫可選拔假此益使人疑陛下臨御



已來凡所選用皆爲至公旣非聖情所難改移即臣安得  
不動有論諍若齊總必有可錄陛下須要酬勞即明書課  
最超一兩資與改今四海舉朝之人不知齊總功能衢州  
浙東大郡總自大理評事兼監察御史授之使遐邇不甘  
兇惡騰口伏乞聖慈少迴覽臣所請陛下若謂臣爲不切  
不懇伏乞陛下試停茲詔密使人於外聽察必賀聖明開  
納必賀聖明無私禽魚草木亦知感悅歡聲必山呼雷動  
聖德必一日萬里授官中謝日具以面奏詔敕有不便者  
伏請封取進止今齊總詔謹隨封進

請再令憲官驗祖好時奏

府縣上事不實罪止奪俸停官其於宏宥已是殊澤但陛下使品官覆視後更擇憲官一人再令參驗則察視轉審

隱欺益明事可觀聽法歸綱紀臣受官中謝日伏請詔敕有須詳議者則乞停留晷刻得以奏陳此敕既非急宜可以少駐

夏早上疏

令四

新

舉

陳

之

臣伏聞陛下數月已來齋居損膳為兆庶心疲又敕有司走於羣望牲於百神而密雲不雨首種未入豈觴醪有闕

直無毀校防川之誤推輔理之功有輻輳並進之歎泥金  
方草仙鼎忽成汗漫無從希夷永閔哀同軌之將會仰鴻  
名之可易鋪衍至蹟錫乎無窮謹按經義參諸諡法曰應  
物無方之謂神保大定功之謂武尊仁安義之謂孝經天  
緯地之謂文大行皇帝變化無窮樞衡在握神莫過焉金  
湯善師豺狼擾馴武莫威焉承休繼志永錫不匱孝莫大  
焉輝焯王度煥乎黼藻文莫逾焉考墳史而徵德實請上  
尊諡曰神武孝文皇帝廟號曰德宗

順宗至德大聖大安孝皇帝諡議

臣上稽太古皇帝之建尊諡也咸揭盛德以旌至公備禮於郊即天成命易名之典也故堯不稱巍巍成功而以傳聖爲盛德禹不稱乃錫元圭而以成功爲盛德此五帝三王統天作諡之大範也伏惟大行太上皇天作睿哲生知太和揚九聖之耿光開萬紀之休運雲行雨施不俟終日廣愛博教克成浹澤萬物德大乎義軒公天下道高乎堯舜原夫君人之表教於岐嶷造物之用先乎著龜在宮播爲善之樂主器流作貞之慶視膳有法文之孝撫軍有戡羿之庸毓全德於春闈積大望於覆育垂三十載矣三

祈祀非誠爲陰陽適然豐歉前定何聖意精至甘澤未答也臣歷觀自古天人交感事未有不由百姓利病之急者切者邦家教令之大者遠者京師是萬國所會強幹弱枝自古通規其一年稅錢及地租出入一百萬貫臣伏冀陛下即日下令全放免之其次三分放二且使旱涸之際免更流亡若播種無望徵斂如舊則必愁怨遷徙不顧墳墓矣臣愚以爲德音一發膏澤立應變災爲福期在斯須戶部所收掌錢非度支歲計本防緩急別用今此炎旱直支一百餘萬貫代京兆百姓一年差科實陛下巍巍睿謀天

欽定全唐文 卷四十九  
下鼓舞歌揚者也復更省察庶政之中有流移征防當還而未還者徒役禁錮當釋而未釋者逋懸饋送當免而未免者沉滯鬱抑當伸而未伸者有一於此則特降明命令有司條列三日內聞奏其當還當釋當免當伸者下詔之日所在即時施行臣愚以爲如此而神不監歲不稔古未之有

德宗神武孝文皇帝諡議

皇莫大於羲軒帝莫加於唐虞妣氏商鎬亦續憲度咸紀名諡以揚昭光徵儒臣之議所以本至公也號全德之尊

以節一惠也發揮茂曜如揭日月伏淮大行皇帝文思  
濬哲天縱神授大明繼聖大孝尊親服道稽古洗心藏密  
巍巍易簡赫赫功造嚴祖宗而上下昭假仁億兆而飛沉  
表靈始者薊寇殘魂戎旌未偃方由雍邸出總虞師刷讎  
恥而戴君父超維城而升少海元良有開歷數誕膺同商  
宗而心在諒陰泣漢制而禮從權令然後諏咨對越端拱  
而理時丁祲沴盜起泚烈宸算獨復雲雷駿奔浹底定  
鯨燎殲洗反已哀痛大猷彌尊阪泉威武止殺弔人之志  
也金方朔陞獫狁昆夷趨起獷悍不敢不率丹穴南裔扶

桑東極自古未化占風而至鏡照廣及無思不服之德也  
大本達道是爲中和鼓而舞之名我至樂變草繁淫以貞  
神人奉聖順聖元侯繼獻九成八佾聖作明述垂衣脫劍  
訢合猗那之奏也觀文化成匠物研精四始六義勤詣風  
雅洪音巨麗焜耀皦繹立言垂訓丹書元鳥之作也蠲疴  
保全壽天之門方疏溥錫目之廣利札瘥不聞長養推仁  
施齊天地如保赤子之誠也教由德禮人乃恥格古作訓  
夏我箴政刑載宏哀敬用息刀鋸利見大人循本愧心之  
旨也躬信厚而偷薄以革體清明而貪饕以懲納匪躬之



善方躋乎聖敬六氣遠嬰乎沈痼德宗皇帝慮繼明之重  
深惟疾之憂積其不憚至乎大漸天崩地坼當瞑眩之辰  
流沙漸海有震動之懼而大行太上皇明德動天神化無  
爲上虔九廟下恤兆人深冀翌日之瘳大慶即端之作於  
是建冢嫡以發大號赦天下以壯皇猷聖作明述周流灌  
注若乃奄巖穴以搜賢才能官則哲之道也黜進獻以藝  
貢賦籍田任土之利也滌疵瑕而復放竄解網泣辜之仁  
也蠲逋責而惠困窮寬大易簡之義也用能垂拱而神人  
交泰元默而動植究安巍巍蕩蕩聖德如風烈雷迅不崇

朝而溢乎八紘矣猶爲以黎獻之富教未洽陵寢之制度  
未成深圖甘害於恬頤力政不憚於增劇旣而同軌畢至  
萬邦咸寧奉先之孝克終傳聖之義斯舉釋負寶位栖神  
玉清追姑射之高踪樂華胥之妙道大矣哉與天地合其  
德則不爲而成與變化合其神則不疾而速聖造盤薄元  
風汪洋所謂天授非人力也方陋唐虞之異族樂文武於  
同時振耀重光永清四海孰謂初陽變候素疾彌留徵秘  
術而俞扁必臻走羣望而圭璧斯罄何翠華之不駐乘白  
雲而上仙攀號刀劍哀震寢區皇帝悼極憂以致養痛大

數之不延外遵易月之命內茹終天之酷詞不朽於禮諡  
旌罔極於受恩敢敷聖德垂鴻惇史謹按易曰天地之大  
德曰生聖人之大寶曰位諡法曰寬裕和平曰安敬慎所  
安曰孝大行太上皇乘運統天端拱造物可謂至德感神  
翊運光明正位可謂大聖永圖丕構傳聖保和可謂大安  
九族安之兆人賴之可謂大孝下採華夷之望上合神祇  
之心請上尊諡曰至德大聖大安孝皇帝廟曰順宗謹議

穆公集序

班孟堅謂有漢文章與三代同風巨唐化成稽古斯文配

炎靈之盛浸息淫靡歸於正聲由是業文之士蓄靈含粹  
光價時獨者往往間出吾友河南穆員字輿直麟蔚鳳采  
自天而授誦六經得其研深閱百代得其英華屬詞匠意  
必本於道夫龍圖龜書三統之有述皆文之蘊也自雅頌  
風騷而下則又粉澤而成黼藻雕鑿而爲形象比其音而  
曲度之緣其情而哀樂之悠遠易直昭明典則本情性而  
根教化者率漫羨魁壘繁音豔彩習怪誕而尚沉溺者也  
穆君泝其波流擇其宗師以爲文宣王經春秋序詩書繫  
易象猶日月不可及矣游夏荀孟李斯賈誼之徒是宜學

者十駕百已鑽仰而憲章者也故其文融朗恢健沉深理  
辨墉闢四會精銚百練結而爲峻極散而爲游衍其工也  
異今而從古其旨也懲惡而從善跡夫孝於其上慈於其  
下擇中庸而後蹈推久要而後交則向之詞藝由積衷淳  
耀發而爲身瑞者也顏回黃憲仁而天促揚雄司馬遷才  
而不試穆君年逾四十用止幕畫并四賢之德器而祿壽  
似焉彼洪鑪埏埴真宰不直歟爲天地無心芻狗萬化歟  
大凡碑誌文冊銘贊記序六十五首共成十卷於先府君  
先夫人元堂誌見自身刑家自家刑國父父子子夫夫婦

婦之道於祭顏太師張相國文見君仁臣忠捍患成功感  
憤激烈死輕鴻毛之道向使假其永齡登金馬石渠與獻  
納論思之臣發揮謨訓潤色王度則聖朝文苑頌甘泉賦  
羽獵卿雲裊皋羣子之列加一士也斯楊嗣仁所以賦已  
友之哀余所莫疑矣宋之間遺草編次授於伯兄舊御史  
中丞今常州刺史善知音者唯子期乎發篋開卷如升元  
圃將垂來代敢失其傳

唐故侍中尚書右僕射贈司空文獻公裴公神道

碑銘 并序

地配天而萬有生息賢合聖而百常順序巨唐六葉明皇

帝登寶位之廿一祀得師文臣侍中文獻公闕二階益闕一

字鏡照孟清陳力推闕一昭闕六耀卿字子渙河東聞喜

人也伯益裔孫非子周封於秦至桓公少子鍼去國食采

於晉其邑曰韮遂為氏焉自鍼至闕一代祖闕一四葉昭

義振闕一重闕十景仕周舉秀才富平縣令大王父正隋

豐州司馬蘇州大總管府贊治王父睿皇朝舉秀才授許

州司戶登明經高科遷闕二郎闕三考守真闕九封尉太

常博士詳正學士夏官員外成寧二州刺史贈戶部尚書

公即尚書府君第三子也初河東夫人之夢熊羆神闕二

字第聖闕一中書判入等補麟臺正字未幾丁尚書府君

憂荼蓼之毀禮不能節服除調集以太夫人有羸老之疾

乞闕官闕十翰索轉國子主簿詹府丞太夫人捐館莫闕一

字溢米哀憐滅性制終除河南士曹參軍睿宗闕一嘗列

宮寮加朝散闕二十時謂淫雅不雜而繩墨誠陳也亟轉

兵部郎中長安縣令轂下塗多事并利弊相習名迫闕一

誤堅貞鮮遂公更張其闕二月政稱神明時宰有銜初醜

正者出濟州刺史索換宣冀二州清明愷悌三郡一政物



皆饒阜人不闕一欺而濟陽信都闕二十除左庶子仍領

崇文館事疾閒復拜戶部侍郎尋遷京兆尹上曰神都地

有歸會豈闕一更宜處風化取則付之於卿公下車而闕

四革闕一漁奪兼并者讓田而市義穿窬椎剽游惰苦窳

莫不耿禁令而却走視條經而易業明皇帝嘉器任闕一

適每前席以聽闕十糴貴幸活也上徵救人之術公述陳

王者損上益下宅土中關內之利因奏鼎新漕運以廣儲

廩置河闕一三門闕一崖集津倉闕十有陘東之積中都

有不涸之饋功齊神化利及億兆逋負之徒征徭之眚追

琢貞珉詠謠仁智今在於道左明皇帝舉勞旌善擢授闕

四字士天下轉運都使尋遷侍中加銀青光祿大夫又以千

畝五推之禮加金紫光祿大夫中書令張九齡奏請和鑪

鎡鈔公以為闕十六字夷州刺史楊闕一字賊汚詔下闕一字寵仍

杖六十公以為郡守當父母百城鞭闕一字實闕一字損闕一字

敬以流代死聖朝之寬典也殘毀闕十九字河西隴右兩道節

度公密疏曰嘉連長闕一字趨悍勁勇闕於沈深計慮矜功

侮敵恐未百全後果喪師失律大起邊患三者皆悉闕十八字

藻闕一字衡之動由其極齊闕三字溥博幾闕一字用有藏晦中

無磷淄推功與能瘧惡闕一違皆所以載編簡而成乎表

式洽闕一聞而播闕十右僕射上嘗命畫工寫貌圖於凌

煙閣手制曰所謂傳神國之故事自武德至是宰輔一百

八十七人登丞相左右揆其一其闕十盈闕一若虛貴而

佳卑衣無華綵食不珍異正考父之益恭晏平仲之矯時

遽瑗之暮夜匪懈孫闕一之衣衾不飾取類前志我無媿

心闕十著蔡俱與公結金石之契闕三律之闕一王闕一

味逝為牙期也濟川中止孰主大鑪難老不錫曷云輔善

以天寶三載七月十八闕十震悼罷朝贈太子太傅諡曰

文獻以其年十月歸葬絳州稷山縣姑射山之陽尚書府

君塋東四里有子八人遂泛淑綜延闕十漢數闕三豈德

祖同歟綜皋最知名綜官至吏部郎中皋官至給事申郎

中淑吏部侍郎佶京兆少尹武給事中闕一諫議闕十九字

之益於闕一詞推麗則之雄由不及道嘗踐門闡功德儀

刑將垂芳於不朽發揮鑽仰孰授簡之當仁銘曰

日月貞明洪鈞造物股肱匡戴宏化陰隲於赫明皇追蹤

昔王聿求仁哲俾闡昭光文獻膺時慶霄未闕三四靈闕

七世風流慶存翼子貽孫江海華藻圭璋後昆靈源之上

姑射之下宰

闕一 域闕字

曹松檟照燭歲蕤崢嶸豐碑絳

闕三 馨稷闕下字

祭楊郎中文

終元十九年歲次癸未四月壬午初二十二日癸卯給

事中許孟容吏部郎中李儻司封郎中韋成季屯田員外

郎穆員右補闕張惟素京兆府司錄薛丹等潔牢醴庶羞

以祭於兵部郎中楊君之靈大鈞生生陰隲者誰殲惡輔

善胡顛倒之擬聖草元子雲位卑中庸殆庶回天不時吾

友懋功粹靈天姿文爲國華行作人師不至公相不登期

頤嗚呼昊穹報施云欺交以利合滔滔其眾直義許心惟  
君附錄金石非固韋弦迭用柯葉四時古之所共昔也三  
虎季奪天縱今也二龍叔聞邱慟甲乙論辨聲聞我求桂  
枝崑玉郤氏無傳典校蓬山佐賢戎州渚宮峴首人賴嘉  
猷瑤墀記言方冊潤色列宿有耀彌綸皇極鼎臣專征在  
浚之郊輟我綱轄俾叅鞬橐元侯歸全符節自朝戎有伏  
莽變生中宵呀呀獲噬鄜里流血正直之形豺狼不啞歸  
來間燕望在清切琴史方娛簪裳靡屑抒懷摛藻致遠詞  
絕文昌貴郎莫最司戎惟是利器簡於宸衷求賢得人天

下至公鴻鵠不翦麒麟在馭九霄咫尺萬里跬步躡影搏  
風遏之中路天若可問余徵其故先哲嗣仁蕃翰蓋臣南  
國之紀洞庭之濱叫呼在聆淚血在巾擿裂酸楚悽心動  
神賓階寂寥總帳叅差露濕芳樹風淒曲池劒光塵昏履  
跡苔滋幽琴夏而無聲玉笋盈而不持惟古今之俱盡悟  
彭殤之一期留景食霞兮昔人謂誰隙駒舟壑兮達者不  
悲齊修短於一致必後先之匪移平生理言造次在茲本  
懸解之達觀吁坦懷而暫夷哀挽徐出泉臺永閔觴豆匪  
馨塗芻有位蒼山霧冪素漣波駛紛帷輶之依遲杳精魂

之髣髴匍匐友好伶俜孀稚玉樹春凋文星晝墜士歎梁  
木朝嗟國瑞三月徒來百身無異緘惋痛於曾抱孰哀調  
之可既尚饗

遺德之昭昭留景身靈令昔人謂靈則神長空今  
秋香滋幽琴夏而無毒玉樹金而不可測昔今之  
轉寶物寐寒暑新亦無靈氣去樹則靈由幽驗  
因之強似真之實和平時知血非由鮮聚如  
風國之車絕天琴平問余始其始矣曾謂公  
不至公斷斷不前類類由如公曾以久得聖聖也